



Broj: 02-05-1111/19
Datum, 31.10.2019. godine

ZAPISNIK
sa 30. redovne sjednice 6. saziva Općinskog vijeća Doboj Istok

Trideseta redovna sjednica 6. saziva Općinskog vijeća održana je dana 26.10.2019. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, Enes Bećirović, pomoćnik općinskog načelnika prostornog uređenja, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Alirizah Mujkić, pomoćnik općinskog načelnika za poduzetništvo i finansije, Admir Dautović, direktor JU Mješovita srednja škola Doboj Istok, Almasa Babić, pedagog JU OŠ „Brijesnica“, te predstavnik RTV TK.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „Selamim kolegice i kolege vijećnike, pomoćnike općinskog načelnika, predstavnike javnih ustanova i predstavnike medija. Izostanak niko nije najavio, a odsutni su Mirzet Mujkić i Mehmed Mehinović i trenutno je prisutno 15 vijećnika.“

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu.“

Emira Karić, predsjednica kluba vijećnika SDP: „ Srdačno pozdravljam sve prisutne. Nismo se dugo vidjeli i nadam se da će i ova sjednica proteći onako kako treba. Ja imam dva vijećnička pitanja i smatram da mi može na oba vijećnička pitanja odgovoriti gospodin predsjedavajući i to usmeno na samoj sjednici. Znači ne zahtijevam neki veći protokol. Prvo vijećničko pitanje glasi: Kako se bespravno donesene odluke stavljaju van snage? Ja sam pročitala zapisnik sa zadnje sjednice, kolega Kemo je u ovom terminu vijećničkih pitanja i inicijativa govorio kako bi Vijeće pomoglo našim privrednicima, ne želim sada da imenujem sve, a vi ste njemu pokušavali dokazati da to što taj privrednik želi ne može dobiti, jer to nije u nadležnosti općine, nego je ta parcela u nadležnosti zemljirođničke zadruge. Ja ću vas podsjetiti da smo mi donijeli dvije odluke koje su bespravno donesene, jer smo dobili obrazloženje, a to su Odluka o izgradnji spomenika i Odluka o izgradnji Centra za socijalni rad. Donijeli smo odluke da se može izgraditi spomenik i da se može izgraditi zgrada Centra za socijalni rad, a da zemlja pri tome nije prenesena na Općinu, odnosno da je još uvijek vlasništvo zemljirođničke zadruge. Zbog takvog odnosa službe prema Vijeću, odnosno zbog vraćanja digniteta ja imam jedan prijedlog. Ja znam kako se odluke stavljaju van snage. Odluke se stavljaju van snage tako što se donese odluka da se odluka stavi van snage. Ja predlažem pauzu od sat vremena da vi donesete, odnosno imamo ovdje pravnik da napravi te dvije odluke koje bi mi danas stavili van snage. Tražim ovo isključivo da bi mi vratili svoj dignitet, a to se vrlo lagano uradi, znači klauzula jedan ovom odlukom se odluka ta i ta stavlja van snage, mislim da može biti i pola sata. Ali kažem zbog vaše ozbiljnosti i zbog naše ozbiljnosti ja bih to zahtijevala na današnjoj sjednici, jer bi mi nekako lakše bilo dalje ići i tu ulogu vijećnika obavljati. Ovako mi te dvije odluke stoje kao kost u grlu. Mi zapravo nismo obaviješteni, ne da smo krivo obaviješteni ili prevareni, nego nismo tačno obaviješteni kada smo donosili te odluke, jer vjerujemo službi koja nama donosi takve odluke i daje razloge. Drugo vijećničko pitanje glasi: Ukoliko se donesene odluke ne realiziraju na duži vremenski rok, stavljaju li se one van snage? Koji je to vremenski rok? Ja takođe znam u praksi ako se donese neka druga odluka koja ništi prethodnu, stavlja se van snage. Ja ću vas podsjetiti koje su to odluke donesene, a to je Odluka o osnivanju profesionalne vatrogasne jedinice. Od toga nema ništa i smatram da tu odluku treba staviti van snage i donijeti odluku o osnivanju dobrovoljnog vatrogasnog društva. Takođe imamo Odluku o uvođenju građanskog sata. Ona se ne realizira 2,3, a možda i 4 godine. Smatrate li da takve odluke treba staviti van snage? Ja kao savjestan vijećnik molim kolege sa o ovim stvarima raspravljaju. Gospodine predsjedavajući i zamjeniče, smatram da ste vi prije svega zaduženi za ovakve stvari, za pravljenje reda u ovom

Općinskom vijeću, jer se godinama narušava ugled u Općinskom vijeću po mnogim segmentima, a o tome ću pričati neki drugi put.“

Dr. Ferid Konjić, predsjedavajući Općinskog vijeća: „Molim da se ostavi pismeno pitanje da bi ste dobili pismeni odgovor. Očito kada se zna odgovor nije svrha pitanja odgovor, kada se već zna odgovor. Dobit ćete pismeni odgovor na vijećničko pitanje. Ima li još pitanja i inicijativa? Ne vidim prijavljenih.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „Dobili ste zapisnik sa prethodne sjednice. Ima li komentara?“

Izet Hodžić, predsjednik kluba vijećnika GDS i nezavisni vijećnik Sajib Mešić: „Poštovani predsjedavajući, zamjeniče, uvažene kolegice i kolege vijećnici, pomoćnici načelnika, predstavnici javnih ustanova, predstavnici medija i drugi gosti želim sve da vas srdačno poselamim i pozdravim. Ja imam dvije primjedbe na zapisnik sa prošle sjednice Općinskog vijeća i vjerovatno je to tehničke prirode, a odnose se na moje diskusije. Znači na strani broj 9. i 9. tačka dnevnog pred kraj same diskusije gdje piše: danas kada postoji zakon o sportu, ja sam rekao danas kada ne postoji zakon o sportu, jer ne postoji ni na nivou države niti na bilo kojim nivoima vlasti. Ja želim da ovo uđe u zapisnik i da se ispravi. Ja sam rekao danas kada ne postoji zakon o sportu. Druga primjedba je na strani broj 11. isto je vezano za ovu tačku dnevnog reda, negdje u sredini moje diskusije pa ću pročitati rečenicu. Za većinu igrača mi u fudbalskim klubovima prije 3 – 4 godine imali smo problem nezaposlenosti tih igrača i iznalazili smo mogućnosti da zaposlimo te igrače. Međutim sada vjerujte da i u jednom i u drugom, a vjerovatno i u trećem klubu, jer imamo treći malonogometni klub, ovdje piše u školi sporta, a ja sam rekao i školu sporta. To su primjedbe, nije ništa značajno, ali osjećao sam potrebu da sugerišem. Znači umjesto u školi sporta, jer kada se čita misli se da je malonogometni klub sastavni dio škole sporta, a ja sam rekao i školi sporta.“

Dr. Ferid Konjić, predsjedavajući Općinskog vijeća: „Ima li još diskutacija? Ne vidim više prijavljenih. Samo da kažem da se sjednici priključio Mehmed Mehinović. Dajem na izjašnjavanje. Ko je za zapisnik?“

Glasanje: ZA – 16, PROTIV – 0, UZDRŽANIH – 0. (Mirzet Mujkić je odsutan).

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „Dobili ste prijedlog dnevnog reda. Ja nisam dobio nikakvih prijedloga za dopunu dnevnog reda i ako neko ima prijedlog za izmjenu dnevnog reda dajem mogućnost.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Poštovani predsjedavajući ja imam prijedlog za izmjenu predloženog dnevnog reda. Nisam bio na zadnjem Kolegiju kada je predložen dnevni red za ovu sjednicu i čitajući i razmatrajući ja predlažem ovom Općinskom vijeću na razmatranje i eventualno usvajanje da se predložene tačke dnevnog reda broj 3 i 4. podijele na po tri tačke dnevnog reda. Znači da razmatramo informacije javnih ustanova, dvije osnovne i jedna srednja škola, posebno. Znači tačka broj 3. da bude 3, 4 i 5. a tačka 4. da bude 6, 7 i 8. i da pojedinačno razmatramo i usvajamo informacije o uspjehu učenika i postignutim rezultatima osnovnih i srednje škole za 2018/2019. godinu. Mislim da bi to bilo dosta kvalitetnije i predlažem da se i u narednom periodu, kada ove tačke dođu na dnevni red, pojedinačno raspravlja o njima. Ne znam jesam li bio shvaćen i ako treba još dodatnih informacija.“

Emira Karić, predsjednica kluba vijećnika SDP, je zatražila pauzu od 5 minuta radi konsultacija.

Predsjedavajući je dao pauzu do 10,20 sati.

Mirzet Mujkić je stigao na sjednicu.

Dr. Ferid Konjić, predsjedavajući Općinskog vijeća: „10,20 je i isteklo je vrijeme. Imamo prijedlog vijećnika Izeta Hodžića da se 3 i 4. tačka, koje govore o informacijama o uspjehu učenika i informacijama o upisu učenika u osnovnim i srednjoj školi, razdvoje i da ide pojedinačno za svaku školu izvještaj. Mi

smo u planu, koji smo usvojili za rad ovog Vijeća, ovako formulisali pitanje. Danas imamo konkretan prijedlog i ja dajem na glasanje. Ko je za to da se 3 i 4. tačka razdvoje i da se pojedinačno razmatraju izvještaji?

Glasanje: ZA – 17, PROTIV – 0, UZDRŽANIH – 0.

Sada ćemo umjesto 9 imati 13 tačaka dnevnog reda i dajem na izjašnjavaње cjelokupni dnevni red.

Glasanje: ZA – 17, PROTIV – 0, UZDRŽANIH – 0.

Usvojen je sljedeći:

DNEVNI RED

- 1. Razmatranje i usvajanje prijedloga Odluke o pristupanju Sporazumu gradonačelnika za klimu i energiju i izradi Akcionog plana za održivu energiju i borbu protiv klimatskih promjena (engl: Sustainable energy and climate action plan - SECAP),*
- 2. Razmatranje i usvajanje prijedloga Odluke o raspisivanju javnog oglasa za izbor i imenovanje kandidata na pozicije članova upravnih odbora javnih ustanova i članova nadzornih odbora javnih preduzeća kojima je osnivač općina Doboj Istok,*
- 3. Razmatranje i usvajanje Informacije o uspjehu učenika i postignutim rezultatima JU Osnovna škola „Klokotnica za 2018/2019. godinu“,*
- 4. Razmatranje i usvajanje Informacije o uspjehu učenika i postignutim rezultatima JU Osnovna škola „Brijesnica“ za 2018/2019. godinu,*
- 5. Razmatranje i usvajanje Informacije o uspjehu učenika i postignutim rezultatima JU Mješovita srednja škola Doboj Istok za 2018/2019. godinu,*
- 6. Razmatranje i usvajanje Informacije o upisu učenika u prve razrede JU Osnovna škola „Klokotnica“ za 2019/2020. godinu,*
- 7. Razmatranje i usvajanje Informacije o upisu učenika u prve razrede JU Osnovna škola „Brijesnica“ za 2019/2020. godinu,*
- 8. Razmatranje i usvajanje Informacije o upisu učenika u prve razrede JU Mješovita srednja škola Doboj Istok za 2019/2020. godinu,*
- 9. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu u 2019. godini,*
- 10. Razmatranje i usvajanje Plana aktivnosti za obilježavanje Dana državnosti BiH,*
- 11. Razmatranje zahtjeva Wirac. Net d.o.o. Gračanica za davanje saglasnosti za postavljanje optičkih kablova po stubovima javne rasvjete na području općine Doboj Istok,*
- 12. Razmatranje zahtjeva Ahmetović (Huseina) Ešefa iz Brijesnice Male za davanje saglasnosti susjeda,*
- 13. Razmatranje zahtjeva Hrnjičić (Kadrije) Mine iz Brijesnice Velike za davanje saglasnosti susjeda.*

REALIZACIJA DNEVNOG REDA

Ad. 1. Razmatranje i usvajanje prijedloga Odluke o pristupanju Sporazumu gradonačelnika za klimu i energiju i izradi Akcionog plana za održivu energiju i borbu protiv klimatskih promjena (engl: Sustainable energy and climate action plan - SECAP).

Dr. Ferid Konjić, predsjedavajući Općinskog vijeća: „ Materijal te dobili, tačku dajem na diskusiju.“

Emira Karić, predsjednica kluba vijećnik SDP: „ Ja se izvinjavam, ali ću se dotaknuti usvojenog dnevnog reda, odnosno prijedloga, dobar je prijedlog ukoliko se ovdje to ne bude posmatralo kao neko politikanstvo. Takođe moramo neke stvari razjasniti, o informaciji se zapravo ne glasa. Informacije se prime k znanju, ja znam u mnogim vijećima, tako da ovo razdvajanje nema smisla ako se za informacije ne glasa. Mi uporno glasamo evo već nekoliko godina, međutim zaista, neka vam Omer objasni logičnost da se za informaciju ne glasa. Ali eto neka nam ostane u praksi, tako da i to razdvajanje ako se ne glasa, a neko pokušava nešto postići, onda nema smisla. Da se ja držim tačke dnevnog reda. Što se tiče prijedloga ove Odluke ja bih nju nazvala misli globalno djeluj lokalno. Naravno da se Odluka mora podržati i ja ću se morati osvrnuti na korak jedan gdje se kaže: da bi ste olakšali raspravu Vijeća možete koristiti dokument u obavezi. Što znači raspravljali ili ne raspravljali ovaj dokument nas obavezuje da donesemo, odnosno da

ispravno glasamo kada je u pitanju ova Odluka. Međutim, ne mogu da se ne dotaknem da te velike svjetske korporacije su zapravo one koje bi trebale misliti o ovim stvarima. Oni tek 1,2,3 i daj Bože 5 % zarade prebacuju na ovakve projekte. Ne kažem da mi na lokalnom nivou kao građani moramo razmišljati o očuvanju naše planete, o smanjenju ovakvih negativnih klimatskih promjena, ali smatram da se stvari itekako rješavaju negdje drugo. Takođe i veliki svjetski političari, odnosno politički moćnici kada bi smanjili pokuse po raznim morima isto tako i pustinjama naša bi se planeta itekako sačuvala, ali kažem mi ćemo djelovati lokalno. Smatram da bi izvještaj koji treba poslati te i te godine, što se tiče općine Doboj Istok, itekako bio pozitivan. Svi smo svjedoci i vidimo koliko su naši građani, ja ću se zadržati na općini Doboj Istok, znači razmišljam lokalno, u nekim stvarim savjesni, a u nekim stvarima bi trebali biti malo savjesniji. Savjesni su time, a primjećujete da veliki pomak daju utopljavanju svojih prostorija i toga smo svi svjesni. Znači informišu se šta je najbolje, kako utopiti i evo prelazak na jednu vrstu grijanja koje je itekako ekološki bolje u odnosu na prijašnje grijanje. Mislim da je veliki procenat, bar u mom komšiluku, prešao na tzv. pelet i time poboljšao ovaj izvještaj koji će se morati poslati. Takođe mi imamo stagnaciju u razvoju privrede, opet ni ona ne zagađuje, tako da će izvještaj biti jako jako dobar. Kažem kada bi još neki projekat bio da vozimo te hibridne aute, ali da sa hidroelektrane koristimo energiju, a ne sa termoelektrane, onda bi mi bili svjetski možda i primjer općine. Znači neki projekat da se upolovi cijena nekih hibridnih toyota, pa bi mogli biti primjer nekog izvještaja kada je u pitanju ova tema i ova odluka. Kažem ovo nas obavezuje tako da klub SDP naravno podržava ovu Odluku.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih diskutanata i dajem na izjašnjavanje. Ko je za prijedlog ove Odluke?“

Glasanje: ZA – 17, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o raspisivanju javnog oglasa za izbor i imenovanje kandidata na pozicije članova upravnih odbora javnih ustanova i članova nadzornih odbora javnih preduzeća kojima je osnivač općina Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za prijedlog ove Odluke?“

Glasanje: ZA – 17, PROTIV – 0, UZDRŽANIH – 0.

Sljedeća tačka je koju smo razdvojili, pa molim predlagača sa nam predoči kakav redosljed predlaže.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Za mene najjedostavniji i najlogičniji prijedlog je da 3. tačka dnevnog reda bude Informacija JU OŠ „Klokotnica“, a broj učenika je jedno opredjeljenje, 4. tačka je JU OŠ „Brijesnica“ i 5. tačka je srednja škola. Tako isto poredati i informacije o upisu učenika.“

Ad.3. Razmatranje i usvajanje Informacije o uspjehu učenika i postignutim rezultatima JU Osnovna škola „Klokotnica za 2018/2019. godinu“

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnik SDP: „Nije u redu. Razdvojili ste tačke, a razdvajanje tački podrazumijeva da želimo diskutovati, a ne samo usvojiti, a ne usvajamo informaciju. Nisam se planirala javiti, spasit ću situaciju, pa krećem od JU OŠ „Klokotnica“. Mislim da sam se i u prethodnim tim informacijama javljala i da ne bih ponavljala neke stvari, samo ću reći ono što sam uočila, a mislim da nisam rekla u nekim prijašnjim diskusijama. Naravno sve čestitke. Ovo nije kurtoazija, ovo nije neka laga, ovo je stvarnost. Znači čestitke roditeljima, učenicima, čestitke osoblju, a naravno i menadžment je tu. Postigli ste, direktorice, dobar uspjeh u svim segmentima. Ja ne bih ovde hvalila previše da ne bi neko pogrešno protumačio. Ja ću se samo osvrnuti na nešto što mi je zapalo za oko. Na 1. stranici imamo da je druga smjena do 18 sati i 10 minuta i smatram to pozitivnošću i u OŠ „Brijesnica“ i u OŠ „Klokotnica“. Vidite da se moraju preklapati diskusije i za jednu i za drugu i za treću školu. To je jako dobro. Mi smo, ali davno, radili tako da je do pola osam trajala druga smjena i puno većih smo problema imali. Mislim da i vi i direktor osnovne škole i ukoliko je u mogućnosti direktor srednje škole gledate da pomjerite prema

vidnom dijelu dana, jer to rješava mnoge probleme. Tako samo jedan savjet da gledate da nastava, bar kod većih učenika, što ranije kreće da bi druga smjena isto tako što ranije završavala. Srednja ocjena i prolaznost 100 % na kraju. Srednja ocjena je 4,30 i ja ću na nekoj drugoj tački nešto više reći o ocjenjivanju i srednjoj ocjeni. Ja sam pomno pregledala sve izvještaje općinskih, kantonalnih i federalnih takmičenja i čestitke svim nastavnicima, jer jako jako je teško, dolazim iz branše, zadržati djecu koja su motivisana. Mislim da mi i u sindikatu i u samoj školi trebamo naći druge načine motivisanja djece koja bi išla i predstavljala školu na nekim takmičenjima. Čestitke na kantonalnom takmičenju, ovdje piše geografija Alihodžić Tarik 1. mjesto i Bradarić Amila 1. mjesto. Ipak bi ovo čitanje moralo biti iz razloga što nije zapaženo, jer je to jako jako dobar rezultat za jednu školu. Ovdje sam našla šah međunarodna škola Babić Amer 1. mjesto, Mujkić Berina 2. mjesto i Dedić Sulejman 3. mjesto. Kažem čestitke i učenicima i nastavnicima kada su i takmičenja i kada je redovna nastava u pitanju.“

Senada Džanić, predsjednica kluba vijećnika SBB – LDS: „ Uvaženi predsjedavajući, zamjeniče, kolegice i kolege vijećnici, načelnice sa saradnicima, gosti, predstavnici medija selamim vas i pozdravljam. U toku našeg izvještaja iz dva razloga nije se našlo puno podataka, a jedan od njih je što je septembar mjesec, a kolegica i kolega koji dolaze iz branše znaju da je to mjesec u kome je stvarno puno obaveza oko planiranja godišnjeg plana i programa. Mi smo mimo toga imali završetak nekoliko projekata. Uzeli smo učešće kao škola u pobratimljenoj općini Starše, bili smo izlagači u sklopu sajma Evropa za državljane i na taj način pokušali da uzvratimo, evo već tri godine, da prijatelji iz pobratimljene općine Starše izlažu na našem sajmu. Bile su u toku pripreme učenika za odlazak u Tursku i svašta nešto. Drugi razlog je da taj izvještaj ne bi bio preopširan pa ću vam saopštiti ovako usmeno. U školskoj 2018/2019. godini nastavu pohađa 9 učenika sa smetnjama u razvoju koji posjeduju nalaze i mišljenja prvostepene stručne komisije za procjenu sposobnosti i određivanje podrške djeci i omladine sa smetanjama u razvoju kao i medicinsku dokumentaciju. Ono što smo mi radili u protekloj godini, inkluzivni tim koji predvodi pedagog škole potpomognut defektologom, a imali smo i logopeda prošle godine i socijalnog pedagoga, je opservacija detekcije i tretman učenika u okviru različitih nastavnih sadržaja sa ciljem što boljeg upoznavanja učenika i njihovih sposobnosti i mogućnosti njihovog sociometrijskog položaja kako bi se što kvalitetnije organizovao individualni rad. Ono što mi je jako bitno i sa čim smo zadovoljni u školi „Klokotnica“ to je da nakon opservacije imamo pozitivan odnos vršnjaka prema tim učenicima. Evidentirano je da mnogi učenici pored smetnje koju imaju, imaju još i edukativnu zapuštenost, jer njihov rad u školi nije praćen radom kod kuće. Ono što u izvještaju nedostaje, mi smo ovoj kategoriji, a djeca su inače najosjetljivija kategorija, a među najosjetljivijim je upravo ova kategorija djece sa posebnim potrebama, kao što smo već rekli mi smo u prošloj godini završili lift i pristup za invalidna lica u oba objekta centralne škole. Međutim ono što izvještaj ne sadrži je sljedeće: u saradnji sa organizacijom Save the Children dobili smo donaciju gusjeničara, pomagalo za invalidska kolica da se kreću uz stepenice u vrijednosti 8.190 KM, a sa velikim prijateljem škole nevladinom organizacijom World Vision donaciju u vrijednosti 1.095 KM gdje smo počeli za izgradnjom wc za invalidna lica. Nažalost to nam nije bilo dovoljno, ta finansijska sredstva i projekat je još u toku, a još smo morali da zamijenimo dotrajalu keramiku, riješimo odvođe, sanitarnu čvor itd. Ja se nadam da će u narednom periodu i to biti završeno. Što se tiče pojedinačnih donacija građana koji žive izvan BiH i građana Doboj Istoka imali smo puno donacija usmjerenih ka ovim učenicima i ja bih izdvojila nekada učenicu Osnovne škole „Klokotnica“ Jasminu Dedić koja već tri godine za naše učenike obezbjeđuje 15 kompleta na početku školske godine od pribora, školskih torbi i kroz cijelu školsku godinu prati tu djecu sa užinama. Još jedna ranjiva kategorija naših učenika su učenici koji dolaze iz socijalno ugroženih porodica. Ni to nismo naveli u izvještaju, pa želim ovako usmeno da vas upoznam da smo na puno načina pokazali brigu i za tu djecu, a to je uz pomoć World Vision, Njemačke humanitarne organizacije Die Johanniter kroz nekoliko akcija vijeća učenika, nekoliko donacija Adriatic osiguranja i donacijom pomratimljene opštine Starše. U prošloj godini imali smo dvije donacije od fizičkih lica laptopa za naše učenike, pa smo ih uručili tamo gdje je najpotrebnije. Imali smo redovna sufinansiranja prevoza učenika i užina od strane Udruženja Crveno bijela crvena radost Tuzla. Ono što takođe želim da napomenem da već četvrtu godinu u našem kolektivu postoje jedan odvojen fond gdje radnici škole od svojih ličnih dohodaka odvajaju na dobrovoljnoj osnovi određena sredstva i sa sigurnošću vam mogu reći da nema učenika u školi čiji roditelji ne mogu da obezbijede sendvič, odnosno užinu, da mi to ne prepoznamo i na taj način rješavamo. Ono što takođe nije pomenuto u izvještaju je da smo proširili, odnosno učvrstili saradnju sa nevladinim organizacijama, odnosno sektorom i prijateljima škole. Mi smo pomenuli World Vision kroz izvještaj i Međunarodni forum solidarnosti Emmaus, a ja bih izdvojila i sljedeće: Save the Children, Udruženje Crveno bijela crvena radost Tuzla, Rotory club koji je u protekloj školskoj godini donirao lektira u vrijednosti 2.317 KM školi, pa smo na taj način obogatili naš lektirni fond, Mikroreditnu fondaciju Partner Tuzla, Poljski vojni

kontigent EUFOR-a, Njemačku humanitarnu organizaciju Die Johanniter, Auftofareal Holandija takođe je organizacija koja je prepoznala i postali su prijatelji naše škole, Fondacija Robert Bosch Stiftung iz Njemačke, saradnja sa Centrom za ekologiju i energiju Tuzla, zatim Albero fondacija iz Švicarske i ja bih se ovom prilikom zahvalila firmi „Benitex“ iz Stanić Rijeke posredniku da ove humane ljude i prijatelje dovede u našu školu. U školi su održane 72 radionice na različite teme kako za učenike tako i na edukaciji roditelja i uposlenika škole. Međutim ja bih ovdje, pošto smo bili jedini na Kantonu, koji smo na taj način uradili protiv požarnu vježbu, zahvalila se Civilnoj zaštiti Doboj Istoka, Profesionalnoj vatrogasnoj jedinici Doboj, Emmausu i World Vision koji su nam pritekli u pomoć da to uistinu dočaramo i da učenike osposobimo kako da reaguju u slučaju požara, ali i da se upoznaju sa jednom vatrogasnom jedinicom profesionalnom, a bilo je to jedno lijepo druženje. Ono što bih još napomenula da razvojni tim škole, zajedno sa inkluzivnim timom, u budućem periodu radit će na svim prioritetnim projektima a to je sljedeće: ono što sam već napomenula wc za invalidna lica i osim toga je uređenje učionice za rad za djecu sa posebnim potrebama. Nažalost bilo je puno prioriteta, nismo uspjeli, pa smo izdvajali prostor u biblioteci, ali je teško na taj način raditi sa tim učenicima, pa se nadam da ćemo u narednom periodu to realizovati. Među prioritetima su svakako podovi u našoj školi koji nažalost nisu stigli da se realizuju, kao i namještaj za koji s pravom mogu reći da je dotrajavao i skoro uništen. Grijanje u školi, odnosno realizacija projekta energetske efikasnosti, utopljanja centralne škole, razredne nastave, grijanje u Područnoj školi Stanić Rijeka i nabavka polica za sve učenike škole. Kada kažem polica želim da vas upoznam da, nažalost puno se o tome priča, a malo radi na djelu, naši učenici nose školske torbe čije opterećenje je veće od onoga što njihova kičma može da podnese. Ovo se odnosi pogotovo na mlađe kategorije, odnosno mlađe učenike, pa se bojimo deformiteta kičme i sl. Na ovaj način obezbjeđivanjem klupica da svako dijete može stvari, koje mu ne trebaju kod kuće, ostaviti u školi, imati taj svoj ormarić i uveliko bi olakšali djeci i brinuli se za njihov fizički razvoj. Ono što je takođe prioritetno je zamjena stolarije na fiskulturnoj sali kao i razdvajanje grijanja fiskulturne sale i centralne škole. Nažalost peć koja je trenutno postavljena nije kapaciteta da grije obje ove škole s obzirom, kako sam rekla, stolarija u sali već uveliko otišla. Takođe radit ćemo na postavljanju video nadzora u centralnoj školi, a područne škole imaju video nadzor, kao i ograđivanje školskog dvorišta. Jako je teško ovako veliki broj učenika, a čuli ste da se radi do 6 i 10, kontrolisati bez obzira što su tu tri dežurna nastavnika, kada djeca na bilo koju stranu mogu da napuste školsko dvorište. Centralna škola u Klokotnici nema tribine i ljetnu binu i ja se iskreno nadam da će u narednom periodu i to biti. Ono što bih samo još napomenula vidjeli ste iz izvještaja koliko takmičenja imaju, hvala Bogu uspješno, učenici naše škole. Vjerujte da u protekloj školskoj godini iznašli smo mogućnost i ja sam rekla na nastavničkom vijeću, nema novaca ali za to u imati, da svaki učenik koji se plasira na federalno, državno ili kantonalno takmičenje, a nema mogućnost, direktorica će naći novac da ide na takmičenje. Mi nemamo sredstva da to pratimo i ja ću opet pomenuti da je kolektiv izdvajao vlastita sredstva od svojih ličnih dohodaka i svi naši učenici su išli na takmičenja. Ono što bih još napomenula, a što nigdje nije pomenuto, pa ovako usmeno da vas upoznam, mi smo imali situaciju u centralnoj školi predmetne nastave gdje smo zahvaljujući sredstvima od 4. sajma Kupujmo domaće zamijenili kompletnu unutrašnju stolariju i to smo isto uradili u objektu centralne škole razredne nastave. To je uistinu velik broj vrata, međutim kolege se više razumiju u to, kada se desi da su vrata stara 20 i više godina, izbijanjem je bilo oštećenje zidova i nismo imali novac kako da to vratimo u provobitno stanje. Škola nažalost nikada nije kompletno okrečena poslije rata, jer nismo imali sredstva za sanaciju zidova, mrežice, ljepila i sl. Ja ponovo moram reći da je u vrijednosti od 2.400 KM kolektiv od svojih ličnih dohodaka, tako smo se dogovorili, ponovo smo se oporezovali, naši radnici su radili i djeca su u septembru ušla u lijepe i čiste prostorije. Sve ovo što brojim i što pokazujem u izvještaju, to ne može raditi jedna osoba, to ne može raditi kolektiv Klokotnice bez vaše podrške, bez podrške roditelja i svih onih koje smo toliko puta nabrajali. Ja ću iskoristiti priliku da se svima vama koji ste na bilo koji način doprinijeli da odgojno obrazovni rad u školi Klokotnica ide ka višem nivou, koji ste doprinijeli poboljšanju uslova rada u školama, zahvalim sa nadom da ćemo, ako Bog da, u narednom periodu nastaviti jače i više, jer to dugujemo našoj djeci i našim učenicima. Još jednom vam hvala, pokazali smo na Doboj Istoku da je ulaganje u obrazovanje, ulaganje u budućnost.“

Mehmed Mehinović, predsjednik kluba vijećnika SBiH: „Klub Stranke za BiH će podržati ovaj izvještaj, naravno i pored podržavanja moramo ga i pohvaliti. Iz tih razloga sam izašao da apostrofiram nekoliko stvari. Ovaj izvještaj pored toga što ima kvantitativnu sadržinu ima i kvalitet. Kvalitet sami znate, nisam iz te branše pa neću puno pričati. Kvantitativan je, jer dao nam je puno podataka i svakom je jasno o čemu se radi. Pogotovo nas je fascinirala tabela o upisu učenika u prvi razred, stručna prema roditelja, zaposlenost roditelja, materijalno stanje u porodici itd. Međutim ono što smo mi htjeli da potenciramo jeste da od ukupno 57 upisanih učenika njih 18 ima problema sa vidom. To je za mene jedan

zabrinjavajući podatak za tako malu djecu, pa da li je to pošast na Doboj Istoku i da li to prelazi u neki problem zbog nečega. Time bi trebalo da se bave ljudi koji znaju o čemu se radi, jer 1/3 djece koja je upisana ima problema sa vidom, to je već problematično. Mislim da bi se i mi kao Vijeće, kao i ljudi koji se uže bave tom materijom trebali posvetiti ovom pitanju u budućem periodu. Ako se ovo ponavlja i u drugim školama treba posvetiti pažnju da se vidi šta je to. Naravno o uspjesima škole neću govoriti, jer nisam iz te branše, o infrastrukturnim projektima koji su zaista urađeni dobro i želim da se u ime kluba zahvalim svima onima koji su menadžmentu i direktorici pomogli iz organa uprave i svih organa šire, ali najveći teret je vjerovatno pao na menadžment i na zaposlene. Ovo su zaista impresivni rezultati i želim da nastavite ovim tempom i hvala vam za sve što ste uradili.“

Hasan Hasančević, predsjednik kluba vijećnika SDA: „ Pošto se prvi puta javljam sve vas srdačno selamim i pozdravljam. Izvještaj je dobar, kvalitetan, djeca kvalitetno rade, rezultati se postižu i nastavnici kvalitetno rade. Izašao sam pod jednom stavkom saradnja škole sa ostalim institucijama. Neću čitati ko se sve navodi, ali ću reći ko se ne navodi. Smatram da bi u ovom izvještaju, odnosno u saradnji škole sa ostalim institucijama trebalo da stoji Ministarstvo obrazovanja i nauke TK, Općina Doboj Istok, Općinski načelnik Kemal Bratić, Mjesna zajednica Klokočnica, Stanić Rijeka i svi privredni subjekti općine Doboj Istok koji su učestvovali u realizaciji projekata u Osnovnoj školi „Klokočnica“. Sve ovo što je ovdje navedeno, bez ovog što sam ja rekao, ne bi bilo ispoštovano.“

Emira Karić, predsjednica kluba vijećnik SDP: „ Slažem se sa vijećnikom Hasanom, ali moram reći sa čime se ne slažem, a to je sve ste naveli, a onda ste rekli da treba stajati općinski načelnik imenom i prezimenom Kemal Bratić. To se ne može tako raditi. Znači ako kažemo ministarstvo kažemo ministar x,y, ako kažemo mjesna zajednica, onda kažemo savjet mjesne zajednice u kojem je taj i taj, a ovo je već politikanstvo. Podržala bih sve do tog dijela kad kažete da se treba navesti ime i prezime načelnika.“

Senada Džanić, predsjednica kluba vijećnika SBB – LDS: „ Kako sam spremna i drago mi je čuti pozitivnu kritiku, tako isto i negativnu. Napomenut ću da je izvještaj pisan 17.09. a izvještaj je radila pedagogica, iako ja preuzimam svu odgovornost. Mislim da smo puno toga pokazali u izvještaju i ako je nešto ispušteno napominjala sam zbog čega. Kada kažete da pomenemo privredne subjekte i pomenemo prijatelje škole vjerujte ja se ne bih usudila to staviti u izvještaj. Zašto? Zato što je to tako široko i ispustit nekoga u izvještaju, a ja ću se i ovaj put izviniti ako sam i od udruženja i od organizacija nekoga zaboravila. Ja sam toliko puta pomenula i općinskog načelnika i općinu Doboj Istok da je to nama bila domaćinska kuća. Ja se još jedanput zahvaljujem na tome i smatram da ta saradnja i treba biti takva, jer nam je svima u interesu, jer to su naša djeca i naši učenici. Ispustila sam da napomenem udruženja sa Doboj Istoka, a posebno ću istaknuti Udruženje žena Doboj Istok i Lovačku sekciju Stanić Rijeka. Mi smo imali u Stanić Rijeci situaciju oko pomoćnog objekta škole koji je izgrađen nekada davno. Prislonjen je uz školu i stvarao je vlagu, jer nije bilo izolacije, privremeno pokriven i slično. Nije bio lijepa slika, a nije bio ni funkcionalan za ono što treba, pa su lovci pokazali svoju humanost na djelu svojim radom, izdvajanjem vlastitih sredstava i napravili su novi pomoćni objekat koji sada ne samo da je funkcionalan nego i vizuelno stvara jednu lijepu sliku kada prođete pored škole. Zahvalit ću se kolegi Hasanu što me je napomenuo. Ministarstvo obrazovanja i nauke, koje nas prati kroz kompletan naš rad, a evo u prošloj godini sa 62.000 KM kapitalnih ulaganja koje nisam pomenula. U septembru mjesecu mi imamo jako puno izvještaja i sve što je zaboravljeno molim vas još jednom da uvažite da je samo bilo usljed rada, nikako namjerno.“

Hasan Hasančević, predsjednik kluba vijećnika SDA: „ Nisam imao namjeru da kudim, nego sam samo kazao šta fali. Zbog čega sam kazao šta fali je ono zbog čega je direktorica navela tamo u prioritetima. Ova ekipa ili tim, koji sam ja ovdje podcrtao od 6 – 7 stavki ili nosioca nekih radnji, kada se udruži može to završiti. Moj osnovni cilj u životu je, a i u politici, da nam djeca idu u bolje škole, da imaju bolje uslove, da imamo bolje i sigurnije puteve. To je moj cilj i nisam imao cilj da kažem da ovo ne valja. Da se odmah razjasnimo ja ću glasati za ovaj izvještaj samo zato što je izvještaj iz Osnovne škole „Klokočnica“, a mogao je imati dvije stranice. Podržavao sam neke ljude za ovom govornicom osam godina, sedam izvještaja i vi znate kako je bilo. Pričate o nekom politikanstvu vi ih postavljali, a mi glasali i mi radili po školama. Tako da ne stoji vam ta teorija i oni koji misle da je ovo politikanstvo, nije. Ovo je samo radi unapređenja boljeg rada u školama i da nam je djeci bolje.“

Emira Karić, predsjednica kluba vijećnik SDP: „ Prvo ću da se našalim kada pogledamo veličinu izvještaja, pa prvu diskusiju naše kolegice direktorice, pa drugu diskusiju, čak mi je drago što niste sve stavili u izvještaj, jer ako ova tačka potraje možda ćete se još nečeg sjetiti. Onda bi trebao jedan cijeli dan, odnosno trebala bih tražiti taj slobodan dan, a ne znam imam li pravo na jedan slobodan dan, na isčitavanje nekih naših materijala. Dakle šala. Kada sam pomenuta, želim da budem jasna. Ja sam rekla podržavam to što manjka, a možda manjka još i možda se direktorica ne može svega sjetiti i možda će kada dođe kući reći, joj ostalo je još to i to. Međutim vi ste Hasane rekli da treba spomenuti ministarstvo, treba mjesne zajednice i treba načelnika Kemala Bratića. Kažem ne treba navoditi imena i prezimena, jer mi svi moramo imati istu ulogu, odnosno ista prava u nekome. Ako neko ima pravo da mu se spomene ime i prezime, onda i neki drugi imaju pravo. To su jednaka prava.“

Dr. Ferid Konjić, predsjedavajući Općinskog vijeća: „ Ja inače imam običaj reći da mi što više diskutujemo samo pokvarimo ono što smo rekli. Svi ćemo se složiti da je izvještaj dobar. Iz ovog izvještaja vidimo šta je dobro urađeno i šta fali. Meni je samo jedna činjenica bitna prvo mjesto u svojoj kategoriji. To je za mene dovoljno, jer to je plod rada i saradnje i sa institucijama i sa pojednicima i sa nevladinim sektorom, rad učenika, roditelja, nastavnika, direktora, jer svi to rade. Iz ovog izvještaja nisam mogao zaključiti koliko je biblioteka opremljena, a vezujem se za ovu konstataciju da je toliko djece sa slabim vidom. Ja znam u nekim državama da skoro sva djeca u osnovnoj školi nose naočare i skoro svi nose aparatiće za zube. To su ova nova moderna vremena, mobiteli i hrana. Ja ne znam, a vi vjerovatno znate, koliko su djeca privržena knjigama i mislim da bi trebalo obratiti pažnju na opremanje biblioteka i raditi na tome da djecu vratimo knjigama, a ne samo na skidanje sa neakvih portala ili neakvih stranica. Ja nisam vidio, a vidio sam da su donirane neke knjige i nisam mogao zaključiti koliko je zbilja škola opremljena s potrebnom literaturom, jer tome trebamo okretati pažnju djeci i sigurno će postići šire i kvalitetnije obrazovanje.“

Senada Džanić, predsjednica kluba vijećnika SBB -LDS: „ Zahvalila bih se predsjedavajućem na ovakvom izlaganju i komentarima. Upravo sam se sjetila, što se tiče biblioteke naš bibliotekarski fond s pravom mogu reći da već zadovoljava potrebe naše škole. Napomenula sam da smo mi u prošloj godini u saradnji sa Rotari klubom i Pedagoškim zavodom „Knjiga nikad nije dosta“ realizovali projekat nabavke 208 novih knjiga, ali takođe smo od sajma „Kupujmo domaće“ kupili 300 novih naslova za naše biblioteke. Ono što smo u proteklom periodu uradili je da Područna škola Dolić, pošto se radi o razrednoj nastavi, ima svoju biblioteku za svoje učenike, kako ne bi morali da dolaze do centralne škole i na taj način učenicima je omogućeno da pročitaju više knjiga u kraćem periodu. Od prošle školske godine zahvaljujući Mikrokreditnoj organizaciji Partner i donaciji 12 novih naslova, odnosno 120 knjiga i kupovinom 300 knjiga od sajma „Kupujmo domaće“ osposobili smo i biblioteku u Područnoj školi Stanić Rijeka. Između ostalih projekata koji su trenutno u realizaciji, svi ste vi imali priliku doći u školu i znate da je za pristup biblioteci nemamo urađen taj zid, želimo tu postaviti klupe, želimo osposobiti prostoriju gdje će se naši učenici lijepo osjećati, pa i u momentima kada imaju slobodno vrijeme da sjede i čitaju knjigu, a ne ono što nam se stalno dešava da nam učenici šetaju, nemaju komunikacije, jer gledaju u svoje mobitele. Mi se vodimo izrekom „Knjiga je čovjeku najveći prijatelj“ i „Nije bogat onaj ko puno ima nego onaj ko puno zna“ i pokušavamo to prenijeti na svoje učenike i u narednom periodu svakako ćemo to slijediti.“

Semir Halilović, vijećnik SDA: „ Zaista mi je jedna stvar naumpala da se zahvalim direktorici u dijelu njihove profesionalne orijentacije. Nama koji radimo u srednjoj školi Dobojski Iсток je važno da oni svoje učenike profesionalno orijentišu ka smjerovima i zanimanjima koja ima naša srednja škola kako bi mi dobili određen broj učenika i kako naša djeca ne bi išla tragom drugih škola i drugih općina. Zaista je Osnovna škola „Klokotnica“ za vrijeme mandata i dok radi direktorica Senada Džanić pružila nesebičnu podršku prezentacijama i sve ono što smo mi tražili i htjeli, a bilo je više nego što smo mi očekivali kada smo dolazili iz škole i ja bih se zahvalio na tome.“

Dr. Ferid Konjić, predsjedavajući Općinskog vijeća: „Ne vidim više prijavljenih diskutanata i dajem na izjašnjavaње. Ko je za ovaj izvještaj?“

Glasanje: ZA – 17, PROTIV – 0, UZDRŽANIH – 0.

Ad.4. Razmatranje i usvajanje Informacije o uspjehu učenika i postignutim rezultatima JU Osnovna škola „Brijesnica“ za 2018/2019. godinu

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Emira Karić, predsjednica kluba vijećnik SDP: „ Za ovu informaciju, Omere, ne treba mi slobodan dan zato što radim u toj školi. Dobili smo kraći izvještaj, a dobili smo i neki dodatak, pa da se samo osvrnem. Kažete ovdje da škola ima 21 javni nastup kojim je obuhvaćen veliki broj učenika. To je zaista imponantno i tu je jako puno vannastavnog rada, a da time nastavni proces nije ometan. Znači tu bi zaista navela jedan veliki plus, puno je nastupa i djecu stvarno treba izlagati tim javnim nastupima. Niste mi svjesni koliko su oni u tim pripremama nesigurni, koliko bude suza da bi na kraju efekat bio, hajmo reći, dobar, a kod nekih tačaka i vrlo dobar i odličan. Kažete da su učenici učestvovali na velikom broju takmičenja i smatram da je trebalo navesti sva ta takmičenja, ime i prezime, jer ne stavljamo u istu poziciju učenike iz dviju škola ako sam ja pročitala imena Osnovne škole „Klokotnica“ i mislim da je bilo u redu pročitati bez obzira što ih znam. Jedan pasus je takođe interesantan gdje kažete da je Vijeće roditelja održalo osam sastanaka obzirom da je u toku bila rekonstrukcija škole i da je njihova problematika bila riješiti u što kraćem periodu pitanje prostora u Područnoj školi u koji bi se učenici što brže vratili. Taj je period ostao iza nas i sve je najbolje riješeno. Opet koristim priliku da zahvalim općinskom načelniku, bez imena i prezimena, da se zahvalim organizaciji TIKA, a takođe i Vijeću roditelja, roditeljima, učenicima, nastavnicima i svima koji su doprinijeli da dobijemo, mogu reći, stvarno imponantno zdanje obzirom kakvo je bilo. Ministarstvu se takođe zahvaljujem na novom ulaganju, a to je ostatak škole i nadam se da ćete zaista uskoro biti u mogućnosti, odnosno biti pozvani da vidite sve te radove, jer vrijedi vidjeti, vrijedi proći i vrijedi se diviti i to daje snagu da se ide dalje. Ja bih se takođe osvrnula na srednju ocjenu, ali moram paralelno raditi i Klokotnicu i srednju školu. Ovdje se navodi da je srednja ocjena 4,16, u Klokotnici je srednja ocjena na nivou škole 4,30, a kod srednje škole bih navela da I₂ ima 4,4 srednju ocjenu i to 8 odličnih i 12 vrlodobrih je u tom razredu, a I₄ ima 3,16. Ovo su zaista visoke srednje ocjene. Ja sam nešto ukratko koncipirala, neki svoj stav vezano za ovakvo stanje i mogla bih pričati 3 dana. Mi lokalni nivo možemo se sa time upoznati, ali to su stvari koje se rješavaju na nekim drugim nivoima, odnosno u nekim drugim institucijama. Ovako visoke srednje ocjene su posljedice nekih uzroka. Uzroka ima puno, a između ostalog je jako niski kriterij poklanjanja ocjena. Posljedica svega ovoga je samo jedna opći pad pismenosti i općeg obrazovanja. Najlakše je dati petice i sve super, roditelji zadovoljni, djeca zadovoljna i učitelj može sačuvati svoje zdravlje i svi sretni, a znanje, zar je nekome još bitno. Pomakle su se granice i imamo inflaciju odlikaša. Rezultati dobrog pomaka u obrazovanju, kažem svoje gledište, mogu biti vidljivi najprije vraćanjem profesionalnog odnosa prema znanju učenika i davanju ocjena. Onaj koji uspije uspostaviti fer i korektno ocjenjivanje u školama, odnosno da ojača neovisnost nastavnika, onaj koji nastavnicima bude čuvao leđa i spriječio sve pritiske na njih, taj je uradio posao čiji rezultati mogu biti brzo vidljivi. Ovako visoke srednje ocjene, odnosno prolaznost učenika ruši sistem i to je jedna tema koja ima dalekosežne posljedice. Kao što kaže ona Gausova krivulja sredina, podjednako i to je neki omjer koji vlada u svijetu, podjednako negativnih, podjednako odlikaša. Ovo što se prevagnulo isključivo na jednu stranu neće biti dobro za naš sistem, a kako ćemo rješavati vidjet ćemo u budućnosti.“

Sajib Mešić, zamjenik predsjedavajućeg Općinskog vijeća: „Poštovani predsjedavajući, uvažene kolege i kolegice vijećnici, načelnice sa saradnicima, prisutni predstavnici medija. Meni je žao, obzirom da dugi niz godina pratim i učestvujem u ovim stvarima, da uvaženi direktor Osnovne škole „Brijesnica“ evo već dugo godina ne prisustvuje i ne nađe za shodno da dođe po ovoj tački dnevnog reda. Meni je žao ove gospođe koja je tu prisutna, jer ona neće imati prilike ni mogućnosti da nama nešto Bog zna objasni. Dodatak koji smo dobili naknadno uz ovaj izvještaj za mene lično on ne postoji iz više razloga. Prvo nestatutarno, neproceduralno i van Poslovnika o to jednostavno za mene ne postoji i neću se uopšte na to osvrutati. Kada pravimo poređenje izvještaja Osnovne škole „Brijesnica“ i Osnovne škole „Klokotnica“ i srednje škole vidi se vizuelno koliko su se direktori i menadžment potrudili i koliko cijene nas kao Općinsko vijeće Doboj Istok. Neko je ovdje pomenuo da je nastavni proces bio neometan u Osnovnoj školi „Brijesnica“, a to nije tačno iz razloga što je u jednom periodu, kada se renovirala škola u Maloj Brijesnici, došlo do određenog kašnjenja i što su djeca morala ići u neke improvizovane prostore koji su totalno neuslovni bili. Za mene je najodgovorniji bio za to stanje direktor Osnovne škole. Zašto? Imamo model naše uvažene kolegice koja je pokazala kako se brine i kako se vodi jedna ustanova kao što je osnovna škola. Zašto? Čim su počeli radovi, odnosno rekonstrukcija osnovne škole, ja sam i tada bio ljut kada se to odvijalo i razmišljao sam šta uraditi. Direktor je istog momenta morao biti uključen u smislu da vidi u kom obimu i dokle će se radovi izvoditi, šta će se tamo završiti itd. ali on je pustio da ljudi završe ono što je po projektu bilo planirano za taj dio. Znači on je pustio, pa je tamo završeno onoliko da djeca nisu mogla krenuti normalno u osnovnu školu. Zašto to govorim? Da je on bio na vrijeme uključen u ta sva zbivanja i radove, morao je i mogao je, naravno u kordinaciji sa načelnikom i ministarstvom, na kraju

krajeva upotrijebiti i sredstva koja ubire po osnovu iznajmljivanja sportske dvorane. Znači imao je mogućnosti i ja sam više puta gore navraćao dok su radovi trajali i nisam ga uočio da se pojavljivao. Za mene je on odgovoran što je došlo do te situacije da su djeca u neuslovnim prostorima taj jedan dio provela, po meni bespotrebno. Meni ovo liči, kao što je neko od kolega pomenuo, na odnos sa Veterinarskom stanicom kao što smo zadnjih godina imali. Ne znam zašto, ali tako se otprilike odvija to. Mislim da nije zavrijedilo da ovu informaciju podržimo, a na kraju krajeva informacija se daje k znanju. Čak naprotiv smatram da bi trebali jednim zaključkom uputiti jedan protestni dokumenat da uvaženi direktor treba malo više uvažavati ovo Vijeće i malo više sarađivati sa nama.“

Emira Karić, predsjednica kluba vijećnik SDP: „ Načeli ste, zamjeniče predsjedavajućeg, jednu ozbiljnu temu i ja ne mogu preći preko nje, jer ispast će da ono što je dobro na kraju ne bude dobro i da kanališemo u nekom negativnom smislu. Međutim, moram se javiti za repliku. Što se tiče moje diskusije gdje sam rekla da je nastava odvijana zakonski, stojim iza toga, jer jeste. Predmetna nastava imala je tzv. intezivnu nastavu koja je zakonski moguća, tako da se u tom periodu nastava zakonski odvijala i nemate pravo, ukoliko niste informisani, reći drugačije. Zašto je direktor, ja nisam njegov ni branilac, ni pravobranilac, ni advokat, ni zastupnik, ali gledam svoje viđenje. Zašto se direktor nije pojavljivao, odnosno znao razvoj situacije? Koliko je pravila pozitivnih stvari u tom dijelu općinska služba ili ko je već zadužen, ja ne znam odnos TIKE i tako to, ali oni su isključivi krivci. Njemu čak nije bilo dozvoljeno, stavila se neka ograda i nama nikom nije bilo dozvoljeno da prilazimo, jer radovi su u toku, bit ćete obaviješteni itd. Zaista dok nisu se predali ključevi mi nismo znali, a govorim o menadžmentu, nastavnici, roditeljima i učenicima, kako stoje stvari. Stvari su stajale dobro u smislu urađeno je gro posla, većina posla, a nešto se mora dozavršiti kako bi učenici mogli ući u takve i takve prostorije. Malo se prešlo iznad nivoa zato što su se pojavili neki privatnici koji su obezbijedili da pločice za koje smo mi smatrali da neće biti trajne, pa smo zamijenili itd. Smatram sve na kraju krajeva uspješnim tako da se ne slažem sa tom konstatacijom, jer najviše smo mi nastavnici bili na udaru, jer nismo znali šta objasniti roditeljima. Nismo znali šta objasniti, da li ljudi završavaju u januaru, februaru. Ja smatram da tu nije bilo koordinacije službe ili koga već u opštini i direktora. Možete me demantovati i ono što budete rekli ja ću njemu prenijeti smatrajući da on meni nije prenio dobre informacije.“

Sajib Mešić, zamjenik predsjedavajućeg Općinskog vijeća: „Kolegice, ja i dalje smatram njega odgovornim. Sve to što si i ti sada kazala imao je i on priliku da dođe i da nam pojasni, ako je to tako. Druga stvar, nije njemu niko branio, to je njegova kuća. Ko je njemu mogao zabraniti dok traju radovi da dođe i da vidi šta se događa, u kom obimu i kada se završava, šta se radi itd. Kolegica uvažena može, ne samo njemu, nego i mnogima, biti uzor i primjer, urnek, kako hoćete, kako se to radi. Ko je njoj branio da posjećuje možda svakodnevno i načelnika i privrednike i ministarstva i razne organizacije da kontaktira itd. Kada se nešto hoće, nije uopšte problem. Mislim da je ovdje došlo do greške, ja nisam ni jednog momenta, a možemo preslušati snimak, rekao nezakonit rad, ja sam rekao neuslovne su bile prilike gdje ste obavljali dok su se radovi odvijali. Sami ste kukali da je malan prostor, sprat, ovo i ono i ja nisam rekao ni jednog momenta nezakonit, nego sam rekao neuslovno je vama koji ste radili to, kao predavačima je bilo malo otežano, a naravno samim tim i djeci. Ja sam o tome govorio i složiti ćete se da je bilo neuslovno, a da je nezakonito nisam rekao. Ovo je ispravka krivog navoda.“

Emira Karić, predsjednica kluba vijećnik SDP: „ Ono što mi je najčudnije, a mislim da kod nas žena toga ima jako malo, odnosno jako malo je izraženo, što jako sujetni ljudi prepoznaju sujetu drugih ljudi i onda tu nastaje konflikt. Ne mogu da shvatim da neke osobe za koje smatram da su sujetne govore o sujeti drugih ljudi. Toliko samo ko me je razumio. To što ste rekli ko brani direktoru da dođe, naravno to ste u pravu, ali ja bih nastavila ko brani našem načelniku da posjeti određene skupove na općini Doboj Istok, da posjeti mjesne zajednice, ali mislim da je to njihova stvar, pa ćemo se i mi ophoditi i ponašati.“

Dr. Ferid Konjić, predsjedavajući Općinskog vijeća: „Mi smo dobili informaciju, a diskutanti pričaju o stvarima koje ne pišu u ovoj informaciji. Moj komentar će biti u ovom svemu da je ovo tipičan primjer gdje mi griješimo. Pozicija direktora je vrlo bitna, a mi postavljamo ljude koji nisu dostojni tih funkcija. To je odgovorna funkcija i na te funkcije moramo postavljati ljude koji su dostojni tih funkcija. Ne treba on nas uvažavati, direktor je institucija i mi kroz ovu informaciju treba da dobijemo kakvih ima problema, mi ne razrješavamo vjerovatno, ali možemo neke stvari inicirati i pomoći da se razriješe. Kroz ovu informaciju ja bukvalno ne mogu ništa saznati. Ova dopuna, to je priča koju direktor u svakom trenutku može reći, jer to je uopštena priča. Ovdje nemamo izvještaja matematičkih, odnosno šta je po redu urađeno i da nam inicira probleme koji stoje i koje mi na neki način možemo pomoći da se razriješe. Ovo

je tipičan primjer da mi postavljamo ljude koji nisu dostojni te funkcije. Nije bitno ko je, ali ovo nije prvi put, ovakvu smo mi informaciju dobili i prošle godine. Ako mi budemo nastavili tako, to je razlog našeg stanja u ovoj situaciji.“

Emira Karić, predsjednica kluba vijećnik SDP: „ Ja bih nešto zamolila gospodina predsjedavajućeg. Vi često nama spominjete da mi diskutiramo o stvarima, odnosno o rečenicama ili riječima koje ne stoje u informaciji, izvještaju ili šta god. Međutim ne znam koliko vi pratite regionalnu i svjetsku politiku, ja nešto više volim pogledati skupštine Srbije, Hrvatske i Republike Srpske, čak to traje i satima, tako da neku diskusiju ili tačku dnevnog reda propratim po 2 – 3 sata i vjerujte mi da se tu na tački o traktorima otvore lažne diplome itd. Mislim da to tako cirkuliše, a vi ako želite nama zabraniti, imate tu poziciju, možete nam reći da se ukanališemo u nešto što vi želite.“

Dr. Ferid Konjić, predsjedavajući Općinskog vijeća: „ Pogrešno je shvaćeno. Vi iznosite probleme škole koji u informaciji ne stoje. Ja vama nisam rekao da vi ne diskutujete. Vi iznosite podatke koji treba da stoje u informaciji i da mi imamo to. Moj je cilj bio to, jer vi iznosite stvari koje su trebale da stoje u informaciji da mi njih imamo i da možemo o njima diskutovati. Ja jednostavno ne znam u šta bi se ovo moglo svrstati. Vi ćete se svi vjerovatno složiti sa tim. Možda ja mogu sebi dati za pravo da mogu biti grublji. Ako hoćemo da budemo efikasni, moramo suziti nekakvu diskusiju, jer vi ovdje iznosite probleme u školi kojih nema u informaciji. Zato sam rekao da vi iznosite probleme koje je trebao direktor da iznese da bi smo eventualno evidentirali, pa će se neko zadužiti i pomoći da se to razriješi. Ne kažem ja da je zabranjeno. Ima li više diskutacija? Ima li potrebe predstavnik škole da se obrati? Nema. Dajem na izjašnjenje, ko je za ovu Informaciju?“

Glasanje: ZA – 7, PROTIV – 4, UZDRŽANIH – 6.

Ad.5. Razmatranje i usvajanje Informacije o uspjehu učenika i postignutim rezultatima JU Mješovita srednja škola Doboj Istok za 2018/2019. godinu

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.

Mehmed Mehinović, predsjednik kluba vijećnika SBiH: „ Nisam mislio diskutovati po ovim tačkama dnevnog reda, mislili smo ih podržati. Naravno i ovaj izvještaj klub Stranke za BiH će podržati. Međutim hoću da kažem šta me je ponukalo, a to je da sam prije neki dan pročitao jednu kolumnu našeg poznatog mislioca, da kažem jednog Bošnjaka, koji je objasnio i preporučujem da se pročita, da ne govorim ime, jer jedni ga vole, a jedni ne vole. Rekao je koliko je važno za nas i naš opstanak otprilike da ispravno školujemo svoju djecu. U tom kontekstu hoću par stvari da kažem. Ovaj izvještaj je isto kvalitativno napravljen, ima dosta informacija koje su jako dobre i želim da čestitam menadžmentu i svim profesorima koji rade u toj školi u ovakvim okolnostima, jer drže to sve pod kontrolom i imaju zapažene rezultate. To je vjerovatno zahtijevalo dobar sistematski i kolegijalan rad i to je dobro. Ja sam htio ovdje, jer mi se u prvi mah učinilo da je to malo previše, 14.000 časova izostanaka. Često dođem pred školu pa vidim, međutim kada sam to podijelio sa brojem učenika ispadne da to nije puno, jer ispod 4 sata svaki učenik da je izostao. Kada sam uporedio sebe mislio sam slagati da sam bio primjeren učenik, ali imam tu školskog kolegu, ali imao sam više u srednjoj školi i nije to tako strašno. Ipak cifra od 14.000 na 330 učenika je jako puno i ako se može obratiti pažnja u budućim slučajevima, pa da li treba pedagog da odradi svoj dio posla, profesori svoj dio posla i da li menadžment škole svoj dio posla. Na ovoliko učenika za jednu školsku godinu 14.000 izostanaka je jako jako puno. Koliko je to znanja propušteno? Koliko nedoličnog ponašanja? Šta je rađeno na ulici? To je nešto sa čim bi se trebali pozabaviti u narednom periodu. Ništa nije lično, ništa nije usmjereno protiv bilo koga, nego je jednostavno diskusija u tom smislu da bude još bolje od ovoga što je ovdje napisano.“

Kemal Skopljak, vijećnik BPS-a: „Pošto prvi puta izlazim za govornicu pozdravljam sve prisutne. Ovaj izvještaj od Mješovite srednje škole Doboj Istok je sasvim u redu i dobar kako sadržajno, tako i da ga možemo lijepo razumjeti. Ja sam izašao prije svega da jednostavno pohvalim, jer mene je iznenadilo koliko je posla urađeno u toj školi što se tiče uređenja škole i uslova u kojima naša djeca idu u tu školu. Pogotovo mi je drago da se počelo nešto raditi na ovoj tzv. zelenoj školi koja je postavljena na igralištu, jer ono je bilo već propalo i neuslovno, a tamo su djecu držali. Konačno da se tu nešto uradilo i jednostavno mogu da čestitam nastavnom osoblju i svim uposlenicima Mješovite srednje škole na do sada ostvarenim rezultatima.“

Hasan Hasančević, predsjednik kluba vijećnika SDA: „ Samo da kažem da je informacija kvalitetna i da profesori dobro rade po informaciji. Ovo što reče kolega Mehinović, ja sam jedno vrijeme bio u vijeću roditelja srednje škole, kada je isto iznesen taj problem, pa možda poraditi na pravdanju časova u smislu da roditelji moraju pravdati časove, bez ikakvih opravdanja. Naša djeca dođu do opravdanja i za prevoz i za neke bolešćuge, tako da mislim da se u tom segmentu može najmanje 30% suzbiti to ako roditelj dođe opravdati čas. Koliko vrijeme dozvoljava i koliko su roditelji danas zainteresovani za takve stvari, jer iz mog iskustva ima roditelja koji nisu baš nešto zainteresovani da dolaze u školu na informacije. U informaciji je lijepo navedeno saradnja sa institucijama i ja se direktoru i menadžmentu zahvaljujem za sve što je navedeno ovdje ako je ovo ovako, a jest jer smo imali iskustva da i mi jednim dijelom učestvujemo u ovim radnjama. Svaka čast, ovako treba nastaviti, a prije svega treba nastaviti na podržavanju naše škole, odnosno da bi srednja škola opstala tu gdje jest.“

Senada Džanić, predsjednica kluba vijećnika SBB – LDS: „ Da se ne ponavljam, ali nadovezala bih se na prethodne diskusije i naravno čestitala na izvještaju. Prvenstveno bih čestitala našoj srednjoj školi na uspjesima i pomacima koji su vidljivi u svakom pogledu. Bila sam jedno vrijeme predsjednik školskog odbora ove ustanove i poređenja od ove školske godine, a roditelj sam koji ima dijete upisano u srednju školu u Brijesnici, uistinu su to vidni pomaci i ne samo na poboljšanju uslova rada. Ono što ja kao majka i kao prosvjetni radnik, što mi je stvarno drago da postoji taj nekakav domaćinski odnos radnika prema školi i onda su tu rezultati neizostavni. Što se tiče upisne politike hvala vijećniku Semiru da onaj konstataciji, ja to osjećam i obavezom. Osjećam obavezom svih nas za našu srednju školu, da djelujemo u svojoj lokalnoj sredini da naša djeca pohađaju srednju školu u Brijesnici na našoj općini. Ako je tačna informacija koju sam neki dan čula da je 7 učenika bilo za automehaničare i da je nedostajalo par učenika da se upiše to odjeljenje, smatram da ako se svi skupa uključimo u tu problematiku da će broj učenika i broj odjeljenja u ovoj školi biti sve veći. Naša srednja škola pokazuje rezultate, prepoznatljiva je na Kantonu i na stepenicama vrednovanja je visoko plasirana zato čestitam i nastavite tako.“

Emira Karić, predsjednica kluba vijećnik SDP: „ Pohvale takođe osoblju, roditeljima, nastavnicima i menadžmentu. Ovdje vidim zapažene rezultate Hamzić Dino, predmet likovna kultura, drugo mjesto na kantonalnom, Kahrmanović Amar, historija, treće mjesto kantonalno i Hasančević Amila, engleski jezik, treće mjesto kantonalno. Meni je to za respekta, za poštovanja. Imamo učešće na festivalu i takođe su jako dobra mjesta. Mislila sam diskutovati o broju opravdanih i neopravdanih, ali kolega Mehinović je iznio svoj stav, sa kojim se slažem. Ipak bih vas pitala vezano za dva odjeljenja kada je u pitanju vladanje, jer ovo je informacija o uspjehu i vladanju. Ovdje sam primijetila dva odjeljenja I₄ u kojem imamo 9 učenika sa primjermim vladanjem i 10 učenika sa vrlo dobrim vladanjem. Takođe imamo odjeljenje III₄, koji mi je baš zapeo za oko, 7 učenika primjerno, 5 učenika vrlo dobro, 2 učenika dobro i 4 učenika dovoljno. Zašto izdvajam ova dva primjera? Ovdje je očigledno da više učenika nema primjerno vladanje što nisam primijetila do sada i nisam primjetila u drugim srednjim školama. Da li se ovdje radi o nekim incidentima, pa su se na taj način pokušali kazniti učenici vezano za možda jednu stvar, veća grupacija učenika ili je nešto drugo u pitanju? Ja neću reći za samo razredno starješinstvo, ali smatram da ne smije u razredu biti više učenika koji nemaju primjereno vladanje, nego učenika koji imaju primjereno vladanje, jer će i oni druge povući i već se stvara okosnica jako lošeg odjeljenja.“

Sajib Mešić, zamjenik predsjedavajućeg Općinskog vijeća: „ Meni lično sve škole na području općine Doboj Istok su bitne i važne, međutim na našu srednju školu posebno sam sentimentaln iz više razloga. Obzirom da su moja djeca, i jedan i drugi, pohađali i uspješno završili tu školu, a poslije toga normalno i fakultet, a bio sam jedan duži period u vijeću roditelja, pa sam pratio rast i razvoj te ustanove i mislim da zavređuje svaku pohvalu u svakom pogledu. Međutim, malo prije smo raspravljali o drugim, takođe je i ovaj menadžment može biti primjer kako treba voditi jednu ustanovu, kao i onaj kome je društvo povjerilo da bude prvi čovjek i da vodi tu ustanovu, ovo o čemu je predsjedavajući govorio da mora biti osoba dostojna te funkcije koju mu je društvo povjerilo da to obavlja. Mi kao Vijeće, kao pojedinci gdje god da smo se nalazili, šta radili, imali priliku, mi moramo i dalje promovirati srednju školu. Osnovna škola, kao osnovna to je zakonska obaveza, roditelji upišu djecu prema mjestu prebivališta i tu se priča završava. Međutim srednja škola je nešto specifično gdje mi kao društvo moramo više ulagati napora u cilju da više djece bude upisano. Ja pohvaljujem i čestitam i menadžmentu i direktoru da je jedan broj djece čak iz drugih općina upisan i da pohađa našu srednju školu. To je ljudi uspjeh. Menadžment je stavljen na jednu tržišnu utakmicu kao, malte ne, svaki drugi biznis. Zašto? Zato što mora zadovoljavati standarde i forme, broj djece, broj učenika itd. da bi naša srednja škola uopće mogla opstati po tim standardima. Tako da, opet naglašavam, mi kao pojedinci i društvo odavde, da ne kažem lokalisti,

moramo više dati napora u cilju da se ta djeca, pogotovo naša djeca i to bi trebalo da se podrazumijeva da je to normalno, upisuju u naše srednje škole. Kada govorimo o uspjehu učenika, vjerovatno će direktor tu još nešto dodati, mi ne treba previše, po meni, da pričamo kada znamo da imamo i zlatne studente i uspješne sportiste itd. Ja se u neformalnim razgovorima grčevito borim i dokazujem da je naša srednja škola ravna, ako nije i bolja od nekih komšijskih srednjih škola, koje jedino što imaju dužu tradiciju i samim tim su više i medijski i u društvu eksponiranije. Ja vama mogu kazati nekoliko podataka gdje prilikom upisa na fakultetu, gdje je moje jedno dijete i gdje smo vidjeli i provjerili da iz jedne susjedne škole, sa dužom tradicijom, ni jedno dijete nije položilo prijemni ispit. Tako da vam i to može nešto govoriti, ali neformalno da ne ispadne da nekoga ovdje javno kudimo ili hvalimo previše. To govori o samoj ozbiljnosti i kvalitetu rada naših profesora i našeg menadžmenta. Ovo je za svaku pohvalu i treba podržati i jedino gdje možda svi moramo dati neki doprinos je u popravljaju tehničkih uslova u smislu radionice ili kabineta za izvođenje stručne nastave. Direktor će očigledno nešto o tome govoriti, jer imamo problem da se ti prostori i kabineti opreme sa njima potrebnim tehničkim stvarima kako bi bili još bolji i uspješniji.“

Kemal Skopljak, vijećnik BPS-a: „ Izvinjavam se što ponovo izlazim, ali bit ću kratak. Zaboravio sam u prošloj diskusiji, imam jedno pitanje za direktora. U prvi razred je upisano ove godine 88 učenika. Da li je to više ili manje u odnosu na prošlu godinu? Kakav je trend upisa u prvi razred srednje škole?“

Dr. Ferid Konjić, predsjedavajući Općinskog vijeća: „To su nam sljedeće tačke dnevnog reda, jer smo razdvojili.“

Emira Karić, predsjednica kluba vijećnik SDP: „ Ne mogu da ne repliciram. Morate Sajibe biti jasniji kada kažete neki učenici iz susjednih srednjih škola nisu položili prijemni ispit, jer niste imenovali. Ja hvala Bogu ne bih ni da aludiramo ni degradiramo te učenike, ali trebali ste samo reći ukoliko imate neke informacije da su učenici iz srednje škole Brijesnica položili prijemni ispit na medicini, a nisu učenici, a pitanje je koji prijemni ispit, jer možda učenici iz naše srednje škole nisu ni polagali ni stomatologiju, ni medicinu.“

Admir Dautović, direktor JU Mješovita srednja škola Doboje Istok: „Uvaženi predsjedavajući, dopredsjedavajući, općinski vijećnici, uvaženi načelnice sa saradnicima, gospodo iz medija selam alejkum i dobar dan. Ja neću dugo oko izvještaja, dobili ste u materijalima i pogledali ste šta je i kako je u prošloj 2018/2019. godini. Ova pitanja ću shvatiti kao pozitivne kritike, prije svega. Pokušat ću da budem kratak i da odgovorim na par pitanja, evo prije svega uvaženom vijećniku gospodinu Mehinoviću kada su u pitanju izostanci. Mi smo prošle godine imali do sada u našoj školi najveći broj odjeljenja, 19 odjeljenja, i prvi puta je da je škola dostigla taj broj. U odnosu na prošlu godinu kada smo imali 13.000 okvirno izostanaka, ove godine 14.500, ja mislim da je to opravdavajuće. Kada je u pitanju vrednovanje škola od strane PPZ mi smo jedina škola koja smo u plusu kada su izostanci u pitanju, jer vjerujte da ima škola koje imaju 50 – 60.000 izostanaka. Slažem se da na tome treba još raditi i ako treba još uključiti roditelje i razredne starješine. Ja insistiram na tome da svi učenici budu zapisani da li došli, da li izostali itd. Mi imamo puno putnika koji dolaze iz susjednih mjesta, pa čak i iz entiteta Republika Srpska iz Sjenine Rijeke, Grapske, pa čak i Kotorskog, imamo dosta putnika iz Doboja, iz Suhog Polja, imamo učenike iz Gračaničke općine iz Stjepan Polja, tako da kasni prevoz, pa učenici budu zapisani i to kasnije bude evidentirano kao opravdano i to su neki časovi koji prelaze taj broj. Pitanje vijećnice Karić vezano za vladanje učenika i ja se slažem oko ovog vladanja, ali to su učenici iz stručnih zanimanja, 4 nose stručna zanimanja vozač motornog vozila. Ta vladanja su procijenili razrednici zbog raznih prekršaja koja su napravili u nastavnom procesu. Imamo problema kada je u pitanju samo njihovo ponašanje, a mislim da će u narednom periodu, pogotovo učenici I₄ to vladanje popraviti. Oko upisa u novu školsku godinu i prošlu ja ću na narednoj tački.“

Dr. Ferid Konjić, predsjedavajući Općinskog vijeća: „ Ima li još diskutanata? Nema. Ko je za ovu Informaciju?“

Glasanje: ZA – 17, PROTIV – 0, UZDRŽANIH – 0.

Izet Hodžić, predsjednik kluba vijećnika GDS i nezavisni vijećnik Sajib Mešić, je zatražio pauzu.

Predsjedavajući je dao pauzu od 5 minuta, do 11,45 sati.

Ad.6. Razmatranje i usvajanje Informacije o upisu učenika u prve razrede JU Osnovna škola „Klokotnica“ za 2019/2020. godinu,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih i dajem na izjašnjavanje. Ko je za ovu Informaciju?“

Glasanje: ZA – 17, PROTIV – 0, UZDRŽANIH – 0

Ad.7. Razmatranje i usvajanje Informacije o upisu učenika u prve razrede JU Osnovna škola „Brijesnica“ za 2019/2020. godinu,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Iz ove informacije mi vidimo da imamo 11 učenika više upisanih u odnosu na prethodnu godinu. Mislim da je to nekakva pozitivna stvar, obzirom da imamo minuse u nekim drugim školama. Ipak ako govorimo o sadašnjoj situaciji trenda odlaska možemo reći da na našoj općini takav trend odlaska nije prisutan. Kako sam vidio u Klokotnici je upisano manje 12 – 13 učenika, a ovdje više 11, znači tu se negdje održava brojka učenika koji upisuju u osnovne škole na našoj općini. Ko je za ovu Informaciju?“

Glasanje: ZA – 16, PROTIV – 1, UZDRŽANIH – 0

Ad.8. Razmatranje i usvajanje Informacije o upisu učenika u prve razrede JU Mješovita srednja škola Doboj Istok za 2019/2020. godinu,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Kemal je postavio pitanje, pa molim direktora da odgovori.“

Admir Dautović, direktor JU Mješovita srednja škola Doboj Istok: „Ostao sam dužan na zadnjem izlaganju, zbog silnih pohvala malo su me emocije ponijele, pa halalite. Srednja škola je prošle godine u svojoj istoriji imala jednu od najvećih investicija, vi ste to primjetili, vidjeli ste da škola izgleda danas malo drugačije. Urađena je kompletna rekonstrukcija i toplifikacija školskog objekta sa izmjenom stolarije. Mi imamo svog najvećeg partnera, iako je osnivač svih škola na Kantonu Skupština kantona, tj. mi smo pod nadležnošću Ministarstva obrazovanja, ali naš najveći partner je Općina Doboj Istok. Ja se ovog puta zahvaljujem prije svega Općini Doboj Istok i inicijatoru tih radova općinskom načelniku. Mislim da se na tome neće završiti, škola ide još boljim putem i nastaviti ćemo i dalje sa ulaganjem kako u poboljšanje uslova našeg rada i kvalitet nastave. Kada je u pitanju upisna politika mi smo u prošloj godini imali upisano 88 učenika. Do zadnjeg izvještaja došla su još dva učenika, tako da je taj broj 90 i zadovoljni smo sa upisom. Imali smo u Doboj Istoku ukupno završenih 104 učenika, a upisali smo 90, ali nisu svi sa Doboj Istoka. Upisali smo učenike iz drugih općina i drugih mjesnih zajednica, ali ono što mi je najveće zadovoljstvo jeste da smo upisali učenike osnovne škole iz Stjepan Polja, iz susjedne općine, u tehničku školu. Tako da pored svih ovih problema koje imaju na Kantonu sve škole mi možemo biti zadovoljni iako se nalazimo na takvom mjestu, imamo sa desne strane Gračanicu, najveću školu u državi, sa lijeve strane imamo Doboj gdje imamo tri tehničke, dvije stručne, gimnaziju i medicinsku školu i mi smo na pola puta i opet uspijemo da upišemo 80 ili 90 učenika i to je izuzetno dobar uspjeh. Tu su učenici gimnazije, tehničke škole, prehrambeno tehničke škole i dva stručna zanimanja vozač motornog vozila i tekstilne stručne škole, krojač. U školskoj 2018/2019. godini mi smo upisali 92 učenika i nema velikih odstupanja, a to je najbitnija stvar. Te godine je završilo 113 učenika u Doboj Istoku, prošle godine 90, a završilo je 104 učenika. Ja sam se malo bavio analizom za sljedeću školsku godinu i šta je cilj menadžmenta škole i školskog odbora, naravno i lokalne zajednice. Mi trenutno brojimo 18 odjeljenja, a prošle godine smo imali 19 i četiri razreda će iduće godine da izađu iz naše škole. Na Doboj Istoku završava u Osnovnoj školi „Brijesnica“ 22 učenika u Područnoj školi Brijesnica Mala, a 23 u Osnovnoj školi u Brijesnici Velikoj, u Osnovnoj školi „Klokotnica“ 75 učenika i mi već imamo nekakav plan koja su to odjeljenja. U Osnovnoj školi u Lukavici su 34 učenika, Osnovna škola „Petar Kočić“ Sjenina Rijeka 23 učenika što je ukupno 177 učenika na koje mi pokušavamo kroz profesionalnu orijentaciju da budu u našoj školi. Mi to kada saberemo to je od 6 do 7 odjeljenja i kada uzmemo da će u našoj školi iduće godine ostati 14 odjeljenja škola bi trebala, ako Bog da, ako prođe upis kako treba, da ima najveći broj odjeljenja kako postoji, a to je 20 ili 21 odjeljenje. To je 7 odjeljenja iznad minimuma za opstanak srednje škole i ja mislim da smo ušli u

jednu mirnu vodu, da čak pripadamo školama sa većim brojem učenika, a to bi bilo okvirno oko 370 – 380 učenika. Ja mislim da bi to bio do sada najveći uspjeh kada je upisna politika u pitanju.“

Mehmed Mehinović, predsjednik kluba vijećnika SBiH: „ Ne mogu da ne podijelim sa vama jedan podatak koji će vjerovatno biti interesantan svima nama. Ja sam često diskutovao ovdje kada govorimo o privredi u Doboj Istoku da je privreda jako dobra, a može biti i bolja. Sada govorimo o školstvu i opća je ocjena da je dobra situacija, međutim uvijek može više i bolje. Čitao sam neke standarde populacije stanovništva ako je od 10 – 15 % okupljenost osnovnim i srednjim obrazovanjem od populacije stanovnika koji žive smatra se da je situacija jako dobra. Da vam kažem tu općina Doboj Istok zauzima jako dobru poziciju u Federaciji BiH, otprilike 1288 učenika što će reći nešto oko 14 % stanovništva obuhvaćeno osnovnim i srednjim obrazovanjem. Ovo što je kod nas evidentirano, a ako imamo u vidu da ima i u Doboju naših srednjoškolaca, ima i u Gračanici, ali ima i iz drugih općina, kako reče prethodnik, kod nas. Prema tome i tu smo otprilike jako dobri. Ovo ne mora da znači da se uspravamo i da direktor i menadžment treba da šute, treba iznalaziti nove mogućnosti, nova atraktivna zanimanja, nove metode obrazovanja i ići ispred koraka pedagoških standarda i da to bude još bolje. Nisam mogao da sa vama ne podijelim, jer ovo je tačna informacija, možete i vi skinuti na internetu to da smo i u tom segmentu jako jako dobri, jer imamo negdje oko 1300 djece obuhvaćeno osnovnim i srednjim obrazovanjem i to je jako dobro.“

Admir Dautović, direktor JU Mješovita srednja škola Doboj Istok: „ Jednu sam stvar ostao dužan da kažem. Potrebe tržišta rada pratimo. Vjerujte mi da smo prošle godine imali učenike automehaničare, njih 13 je završilo, iako je malo odjeljenje bilo i 9 je odmah dobilo stalni posao. Nisu čekali ni diplomu da podignu svi zajedno nego su otišli ranije da potpišu ugovor sa firmama iz Doboj Istoka, a imamo učenika koji su završili u firmi Urban. Ja bih predložio za naredni period, ako nije problem, kada je u pitanju upisna politika da se stavi tačka na Općinskom vijeću, pa da zajedno Općinsko vijeće i menadžment škole napravi neku strategiju plana upisa. 177 učenika koje mi pokušavamo da pridobijemo u našu školu nije malan broj, pa da zajedno pokušamo vidjeti koja su to zanimanja na tržištu rada, pa da pokušamo napraviti brzu izmjenu elaborata kako bi oformili nova stručna zanimanja i tehnička, pa da pokušamo imati nešto bolji upis.“

Emira Karić, predsjednica kluba vijećnik SDP: „ Ja se ne mogu sjetiti da li ste vi bili direktor, ali smo jednu sjednicu posvetili upravo tome. Raspravljali smo, mogu biti sigurna, oko 2 sata. Moje su diskusije išle u tom smjeru da zauzmemo neki stav šta je to potrebno. Ja se sada mogu sjetiti kolege Izeta koji je rekao, joj Emira previše ti to pričaš, misliš da se škola može okrečiti, staviti tabla itd. Hoću da kažem podržavam i molim vas insistirajte na ovome da Vijeće zajedno sa direktorom upravo o ovim stvarima govori i diskutuje.“

Dr. Ferid Konjić, predsjedavajući Općinskog vijeća: „Ne vidim prijavljenih i dajem na izjašnjavaње. Ko je za ovu informaciju?“

Glasanje: ZA – 17, PROTIV – 0, UZDRŽANIH – 0

Ad.9. Razmatranje i usvajanje Informacije o prinosima proljetne sjetve i pripremnim aktivnostima za jesenju sjetvu u 2019. godini,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnik SDP: „ Ja zaista ne mogu a da ne prodiskutujem ovu tačku dnevnog reda, odnosno informaciju, pa ću krenuti po nekim segmentima. Kažete ovdje prinosi proljetne sjetve poljoprivrednih kultura i kvalitet proizvoda ove godine su bolji za većinu kultura poredeći sa prošlom godinom. Ja znam da se na našoj općini radi uglavnom o privatnom poljoprivrednom zemljištu. Iskreno ne znam otkud statistika, da li kontakti ili odokativno, znači imate svoj metod i ja to poštujem. Zadržala bih se na ovoj tabeli gdje ste rekli šta je realizacija proljetne sjetve i šta je ostvareno u 2019. godini, pa navodili ste redom. Ja sam primijetila ovdje na području naše općine - ostalo povrće i mislim da je jako pozitivno što su se počele zasijavati neke nove vrste na našem području tipa kelja, crvenog kupusa, kelerabe i takođe, ne znam koliko imate informacija, batata koji je po mojim informacijama zdravija varijanta krompira. Čak je i prinos tog batata bio jako dobar u odnosu na zasijan krompir. Mislim da trebamo ići u tom smjeru što se tiče edukacije naših građana i onih koji rade i prodaju neke stvari u

apotekama. Takođe bih se zadržala ovdje gdje kaže učešće krompira u ukupnoj sjetvi je 30%. To je stvarno veliki postotak, ali primijetili ste da zbog relativno velike vlage zemljišta i zraka dolazi do čestog razvoja štetnika i određenih bolesti. Znači urod može biti dobar, ali trajnost toga, na kraju se ispostavilo, da nije dobra. Smatram da bi se trebala neka vrsta istraživanja provesti na nizinskim krajevima, jer primjećeno je opet, to je moja procjena, da su na brežuljcima ipak uspješnije nego u nizinskim krajevima. Nemamo mi svi zemlju brdovitu, pa možda neka vrsta edukacije koja vrsta može odoljeti nekim štetočinama, samo malo više edukacije. Što se tiče poljoprivrede i informacije o poljoprivredi kod nas je to nešto kao narodno stvaralaštvo, više se vjeruje od usta do usta nego onome što se pročita na internetu, jer se radi o tome što taj gazda ili naš građanin direktno zna određene informacije, odnosno izvršio je eksperiment, da tako kažemo. Evo i gospodin načelnik nam može možda reći i neke informacije prenijeti kada je u pitanju da li su planirani neki projekti značajniji za naš kraj budući da je načelnik član Komisije za poljoprivredu u Skupštini Tuzlanskog kantona. Po meni malo čudno, nisam bila upoznata da načelnici mogu biti članovi neke komisije u Skupštini, ali eto možda nam načelnik daje neku poruku da je rijetko dobar intelektualni kadar SDA Doboj Istok.“

Fajik Muratović, vijećnik SDP: „Pošto prvi puta izlazim sve vas selamim i pozdravljam. Ovaj izvještaj je solidno urađen i realan je prema stvarnom stanju na terenu. Ovdje je meni za oko zapalo – ukupan broj obradivog zemljišta 77 %, od toga 51 % oranica, tabelarni prikaz. Međutim krećući se po ovoj našoj ljepoj općini ja sam primjetio sve veći broj neobrađenih površina, zapuštenih površina. U ovom izvještaju to se ne spominje, pa jedna preporuka službi koja je ovo radila da pokuša na nekakav način ovo ubaciti u tu tabelu i prijedlog mjera, stimulacija ili nečeg drugog kako da stimulišemo da se ta zemlja obradi. Još jedna stvar koja mi je isto zapala za oko je 14 % voćnjaka, a u prinosima nema ništa. Da li je to sve otišlo u rakiju ili šta, ne znam, ili je to izostavljeno iz prihoda, ali kada se uzme 14 % to je velika količina zemljišta koje je bukvalno neiskorišteno, jer nema nikakvih prihoda.“

Dr. Ferid Konjić, predsjedavajući Općinskog vijeća: „Ja sam na neki način inicijator ove teme, jer nas svrstavaju da je ovo poljoprivredna općina, a nama je prvi problem plavljenje polja pored Spreče. Informacije koje sam dobio su zbilja porazne vezane za to zagađenje, jest da mi dobijemo zvanične koje su drugačije. Ovo što kaže Fajko neobrađena zemlja i svi mi to primjetimo i ja imam svoje mišljenje u tom pravcu. Nikome se ne isplati obrađivati zemlju, jer su to toliko usitnjena imanja da niko, sem plasteničke proizvodnje, ovu proizvodnju ne može ozbiljno raditi. Dok god se nama ne promijeni strategija razvoja, jer prvo što bi trebalo biti je ukрупnjavanje parcela, jer nema radne snage koja će raditi kao što se nekada radilo. Sada se radi sve mašinski i jedan čovjek može obraditi ovo naše polje sa mašinama. Kod nas bukvalno ta mašina ne može ući nigdje u polje, jer dok se okrene prelazi među. Jedan podatak znam '37. na berzi u Mančesteru je prodavana suha šljiva iz Bosne, a sada se vjerovatno ne može nigdje niko pojaviti bilo gdje na berzi da bi prodavao bilo šta iz naše države. To ide u prilog ovome o čemu ja govorim. Tada su ipak bile daleko veće parcele, iako je rađeno po nekakvom primitivnom postupku, ali su veće parcele bile i mogao se neko pojaviti negdje na svjetskoj berzi da prodaje suhu šljivu. Ovo što Fajik kaže za voćnjake, nažalost kod nas ti su voćnjaci samo hobi. Znači niko se ne bavi proizvodnjom i ovaj izvještaj nama i govori u tom pravcu da mi shvatimo koji su razlozi za to. Mi vjerovatno ne možemo to razriješiti, ali strategija nekakvog razvoja mora ići u pravcu ukрупnjavanja zemljišta da bi se ta zemlja obradila. Vjerovatno ni u Švicarskoj ne bi niko radio kada bi bile ovako male parcele, ne bi se nikom isplatilo, ali kada ima 500 dunuma zemlje u komadu onda sigurno da se ima računa raditi i proizvoditi. Mi dok ne shvatimo da se na taj način treba raditi ili da se bar nekome da ta zemlja da radi, onda bi možda mogao to neko raditi. Ovako je puno para utrošeno u hobije, jer ljudi su dobijali ogromna sredstva da bi zasadili voćnjake, a to je hobi. Niko se ne bavi proizvodnjom i jedino što se u ovom trenutku može isplatiti to je plastenička proizvodnja, a to je za nas na lokalnom nivou, ali da govorimo o ozbiljnoj proizvodnji mislim da ne možemo. Svi izvještaji svake godine pokazuju da ne možemo, dok se ne promijeni strategija, ne može se ozbiljno baviti poljoprivrednom proizvodnjom.“

Kemal Bratić, općinski načelnik: „Sve vas selamim i pozdravljam i zahvaljujem se uvaženoj vijećnici na čestitkama jer sam izabran u tu komisiju. Kada je sadašnji načelnik bio član komisije, vjerovatno neki nisu znali ni da postoje skupštinske komisije, tamo nekada 2005. godine. To je nebitno. Naravno da je bila dosadašnja praksa da određeni načelnici budu članovi komisija i bili su. Bio sam i u manadatu od 2012. godine i zatečen sam tada u jednoj od skupštinskih komisija. Ako mislite da je nešto sporno prijavite izbornoj komisiji. Zašto sam se odlučio nakon dužih pritisaka da prihvatim da budem član te komisije? Upravo iz razloga jer su nekakvi minorni autoriteti, mogu reći i sa područja općine Doboj Istok, bili u prethodnom sazivu i nisu napravili nikakvog posla. Komisija za poljoprivredu je komisija koja je

možda najjača kada se izuzme statutarne pravne i još neka druga koja se odnosi na akta ili zakone koji se usvajaju na Skupštini Tuzlanskog kantona iz nekoliko razloga. Svi materijali da li to bili podsticaji, da li to bila ulaganja prolaze kroz tu komisiju i komisija daje mišljenje, a naravno svi znamo da se svugdje lobira. Ja ću vam reći samo da sam na prvoj komisiji već došao na neki način u sukob sa direktorom Javnog preduzeća „Spreča“, ne bih ovdje navodio šta je bila tema, upravo o čemu je Ferid malo prije govorio o plavljenju. Reći ću vam da smo već dogovorili oko 400.000 KM za 2019. godinu da ćemo uraditi projekat na području općine Doboj Istok. To je za vas informacija, jer vidim da burno pratite sve ono što načelnik radi ili ne radi. Pored toga smatram, kao čovjek koji razgovara svakodnevno i sa poljoprivrednicima i sa privrednicima, sa ljudima iz svih branši, da ću vjerovatno dati veći doprinos nego neki drugi kako u toj komisiji tako i u Ministarstvu poljoprivrede. Kada se radi o podsticajima, da imate informaciju, ja nisam do sada imao i sada imam, na području općine Doboj Istok u 2018. godini je došlo podsticaja oko 700.000 KM. Da li su to konzumna jaja, da li je mlijeko, da li su pčelari, da li to junadi itd. što nije beznačajno. Naravno vidio sam tamo da neke općine imaju nula bodova iz nekih razloga. Mi veoma često kritikujemo sami sebe, a dobra je ta samokritika, ali kada uzmemo neke druge općine koje su veće od nas po broju stanovnika vidimo tamo da nema za kukuruz ništa, da je za mlijeko 10 – 15 puta manje nego Doboj Istok itd. što na neki način treba da nas ohrabri. Naravno najveći problem je što nemamo zemljišta, kao što ima općina Kalesija, pa da damo našim farmerima onda bi nam bilo još bolje. Evo da iskoristim priliku neki dan je bila u posjeti Vlada Tuzlanskog kantona i pored mene su bili moji saradnici i predsjedavajući Općinskog vijeća. Mi smo otvorili niz tema i možda jedna od najznačajnijih je upravo ovo plavljenje našeg dijela Sprečanskog polja koje se stalno dešava iz godine u godinu. Odgovorno tvrdim da je jedan od krivaca loše gazdovanje JP „Spreča“, a drugi razlog, koji je možda dublji i širi, jeste što je korito rijeke Spreče debelo naplavljeno. Ukoliko je neko od vas imao priliku da prošetate pored Spreče mogao je da vidi da se ona sada maltene svugdje može pregaziti, jer je dno toliko naplavljeno i imamo količinu vodotoka u koritu nekih 30 – 40 cm. Želim takođe da kažem rijeka Spreča protiče kroz općinu Doboj Istok nešto malo preko 8 km. Mi smo, ja imam podatke otkad sam ja načelnik, uradili skoro 4 km obala utvrde. Znači dali smo na neki način doprinos svi zajedno, neću reći ja sam, nego svi mi zajedno, naravno uz dobru saradnju sa Agencijom „Sliva rijeke Save“. Kada se radi obala utvrde veoma značajno je da mi zaustavljamo dalje otkidanje ili oduzimanje zemljišta našim poljoprivrednicima. Evo recimo, neće se moj pomoćnik naljutiti, na njemu se vodi određen broj dunuma, ne kvadrata dunuma, a njih nema nigdje. Znači ljudima je Spreča na neki način otkinula ili odnijela, nestalo je, 10, 15 ili 16 dunuma zemlje. To je generalno problem. Mi ćemo naravno i u narednoj godini, već smo potpisali i dobili jedan dio značajnih sredstava, da nastavimo sa obalom utvrdom u Klokočnici. Znači uradili smo jedan dio i nastavljamo drugi, a za iduće planiramo i druge lokacije koje su na neki način najkritičnije i da pokušamo spasiti zemljište naših rančera, poljoprivrednika. To naravno ne sprečava plavljenje, ali sprečava jedan dio u velikom valu, to je tzv. kritična masa kako su rekli stručnjaci. Da li ćemo uspjeti uraditi kompletnu obalu utvrdu na području naše općine, ja ne znam kada ćemo to sve uspjeti uraditi. Ja vas pozivam da odete pogledati projekat koji smo uradili, jer to je zbilja lijepo urađeno, kvalitetno urađeno, dugotrajno urađeno i na taj način spasiti ćemo, ako ništa, to kidanje, jer voda je sila, ne bira čija je zemlja i odnosi. Mislim da su nam ovi poljoprivrednici zahvalni što se ovo uspjelo uraditi. Opet ponavljam to ne sprečava plavljenje, jer glavni problem plavljenja su zatvorena korita. Vidjeli ste svi, nije to samo slučaj sa rijekom Sprečom, to je slučaj i sa rijekom Bosnom ako idete gore prema Sarajevu vidite da je Bosna plitka da i vrapci mogu maltene da hvataju ribu, naravno da to rade. Ono što ja mogu sa sigurnošću reći jeste da će ova Vlada, trenutna Vlada, ovo ministarstvo sigurno bolje sarađivati i bolje podržavati općinu Doboj Istok koja je na neki način zbog tog političkog previranja bila dvije godine pod blokadom, bila je na neki način pod nekom kaznom. Reći ću vam jedan podatak od 2018. godine do 2019. godine općina Doboj Istok nije dobila ni jedna jedini fening od kantona koji se zove Tuzlanski.“

Sajib Mešić, zamjenik predsjedavajućeg Općinskog vijeća: „Prihvatio sam obavezu od nekoliko građana sa našeg prostora, a vezano je za nomađenje po našim poljima. Iz godine u godinu ponavlja se taj problem iako je još na snazi kantonalni Zakon o zabrani nomađenja na području Tuzlanskog kantona. Ja sam preuzeo obavezu od građana da iznesem taj problem i da sa ovog mjesta apelujem i na načelnika i službu u saradnji sa policijom, a eventualno i sa inspeksijskim službama ako ništa bar jednom za primjer, u skladu sa zakonom koji tamo kaže da bi bili obavezni transportovati, odnosno vratiti to stado odakle se pojavilo na našem prostoru. Vjerujte strah me je i svake godine se ponavlja jedna te ista priča i neko može izazvati incident malo širih razmjera sa tim ljudima, jer prave štetu, praktično ovdje nezakonito postoje, manipulišu, kreću se, premještaju itd. Mislim da bi bilo dobro za primjer, ako ništa bar jedan potez napraviti, jedno stado vratiti, u skladu sa zakonom, odakle je došlo, jer mislim da je trenutno važeći zakon na Tuzlanskom kantonu da je zabranjeno nomađenje na našem prostoru. Znači da ne mogu dolaziti sa

drugih područja i dobro bi bilo, zato apelujem na načelnika i službu da u saradnji sa policijom po tom pitanju nešto poduzmu. Iskoristit ću priliku da se zahvalim kolegici, jer nisam bio dorečen kada sam rekao da na jednom prestižnom fakultetu djeca iz neke naše bliže općine nisu položila prijemni ispit, a 5.0 imaju, naći ćete na internetu, za razliku od naše djece kojih je petoro tada položilo prijemni ispit i na kraju uspješno je završilo to školovanje. Ostao sam nedorečen, pa da ne bi bilo nekih neporazuma.“

Kemal Bratić, općinski načelnik: „Mi smo imali ogromne probleme prošle godine sa tim nomadima. Vjerujte da je naša policija uradila određeni dio poslova iz njihove nadležnosti, međutim morali smo, bili smo prisiljeni, angažovati jedinicu za posebne namjene i kada smo to uradili onda su oni otišli. Naravno zakonom koji to reguliše je zabranjeno nomađenje na području Tuzlanskog kantona, međutim ovamo nam fali policajaca po sistematizaciji koju treba da ima naša Policijska stanica. Mi smo otvorili i taj razgovor kada je bila Vlada da se izmijeni sistematizacija, jer smatramo da je potrebno da na području općine Doboj Istok konstantno borave dvije patrole, a ne kako je to sada slučaj da boravi jedna patrola ili eventualno na korištenje godišnjeg, bolovanja itd. To je jedan veliki problem i vjerujte da ćemo i u ovoj godini pretpostavljam imati te iste probleme. Nažalost jedno ogromno stado je bilo iz susjedne općine Gračanica i ne bih pominjao ovdje vlasnike. Znači ukupno su bila tri stada, policija njih otjera, oni samo odu u drugi šumarak, pa se pojavi na drugoj lokaciji za par dana. Tako u saradnji sa građanima, sa našim poljoprivrednicima koji su stalno zvali, policija je to uradila. Naravno zakonski je nadležan kantonalni Veterinarski zavod koji je dužan da izađe na lice mjesta da odredi karantinu i da se ta stoka odvede. Naravno vlasnik bi bio odgovoran po zakonu, ali ne možemo staviti patrolu da blokira njihov ulazak, jer ne idu magistralom. Ja ne znam kuda dođu, vjerovatno preko brda i spuste se tako da ih policija ne može zaustaviti. Da idu magistralom mi bi njih odmah vratili i stavili bi na neki način barikadu i vratili bi ih nazad, jer imamo sve zakonske obaveze da to i uradimo.“

Emira Karić, predsjednica kluba vijećnik SDP: „ Dobro je što sam spomenula komisiju, jer evo pružili ste nam informaciju više. Šta ćete postići pogotovo sa ovakvim predsjednikom komisije meni je veliki upitnik. Neću tužiti nikoga, jer sam informisana da je zakonito da načelnik bude član komisije što mi je čudno. Ovdje ću još samo dodati da je isplativije biti član komisije pri Skupštini TK nego biti predsjedavajući Općinskog vijeća Doboj Istok.“

Kemal Bratić, općinski načelnik: „ Ja bih vas zamolio da ne prozivate, pogotovo predsjednika komisije. Ne znam na kakvim ste vi relacijama, ali ipak je on skupštinski zastupnik. Mislim da to od vas nije lijepo, jer vi ste jedna dama, gospođa, majka i mislim da trebate birati riječi kada nekoga prozivate. Ukoliko smatrate da je to tako za ovu drugu stvar koju ste rekli, ja odgovorno tvrdim da to nije tako, a to ću vam i dokazati.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za ovu informaciju?“

Glasanje: ZA – 17, PROTIV – 0, UZDRŽANIH – 0.

Ad.10. Razmatranje i usvajanje Plana aktivnosti za obilježavanje Dana državnosti BiH,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnik SDP: „ Mislim da je u pitanju štamparska greška gdje kaže čitanje tri najbolja djela učenika na temu Dan državnosti. Mislim da bi trebalo biti literarna rada i molim vas da konkurse, govorim službi, pošaljete što skorije, jer je prilikom zadnjeg takmičenja došlo do nespornosti. Prema riječima gospodina direktora Almira Hadžića poziv je obavljen telefonski nekoliko dana prije svečane sjednice, pa smo to malo ubrzavali i na kraju se djevojčica nije pojavila da čita isto zbog nekog nespornosti.“

Dr. Ferid Konjić, predsjedavajući Općinskog vijeća: „Ima li još diskutanata? Nema. Dajem na izjašnjavanje. Ko je za ovaj Plan?“

Glasanje: ZA – 17, PROTIV – 0, UZDRŽANIH – 0.

Ad.11. Razmatranje i usvajanje zahtjeva Wirac. Net d.o.o. Gračanica za davanje saglasnosti za postavljanje optičkih kablova po stubovima javne rasvjete na području općine Doboj Istok,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.

Safet Smajilbašić, vijećnik SBB: „ Sve vas selamim i pozdravljam. Čitao sam ovaj zahtjev od Wirac. Net doo Gračanica i mislim da ovakav zahtjev kakav je nama došao, uvažavajući firmu, uvažavajući sve, ne bi mogao doći ni pred jedno drugo vijeće. Oni se obraćaju sa zahtjevom u svrhu poboljšanja interneta čime bi stanovništvo i privredni subjekti Doboj Istoka dobili puno kvalitetniji i brži internet za svoje aktivnosti. Hajde što su oni napisali da traže to kako traže, uslugu normalno naplaćuju, nego i obrađivač zaključka nije se ništa potrudio da nama prezentira šta to mi dajemo. Ja koliko se sjećam od ove Općinske službe za prostorno uređenje je bio prije godinu dana zahtjev Telemaha gdje smo tačno znali koliko općina ima tih svojih stubova javne rasvjete i koliko je cijena po jednom stubu te javne rasvjete. Na kraju krajeva kolika su to sredstva na mjesečnom ili godišnjem nivou ne znam, ali i prošli puta kada smo raspravljali o izvještaju Općinske službe za prostorno uređenje rekao sam da bi bilo krajnje vrijeme da počemo ispravljati, nemojte me pogrešno shvatiti, ove „pijane ustaše“, bar magistralom ove stubove, pa onda u unutrašnjosti sela i naselja. Mislim da ovakav zahtjev i ovakav zaključak nigdje se ne bi mogao usvojiti nego samo kod nas u općini Doboj Istok.“

Enes Bećirović, pomoćnik općinskog načelnika za prostorno uređenje: „ Ovdje tražimo samo saglasnost Općinskog vijeća, a poslije toga ide potpisivanje ugovora. Šta smo mi kod načelnika u kabinetu dogovorili? To je kuća iz Gračanice, a oni će to uraditi na području Općine Doboj Istok, da sve raskrsnice, ulaz i izlaz sa općine bude pod video nadzorom. Mi dajemo samo naše stubove, imamo projekat i znamo koliko ima naših stubova, a što su stubovi Elektrodistribucije mi nemamo pravo. Dogovor je bio da pored puta Doboj – Tuzla oni sa svoje strane urade ispravljanje tih stubova. Ugovor slijedi poslije ovoga.“

Kemal Bratić, općinski načelnik: „ Dijelom se slažem sa uvažanim vijećnikom mogla je biti šira informacija. Ispravio bih Enesa neće biti samo ulaz i izlaz, nego sam zamislio da damo našoj Policijskoj stanici da bira, znači bit će svi školski objekti, Dom zdravlja, Općina i svi ulazi, odnosno izlazi i skretanja. Navest ću na primjer Mala Brijesnica skretanje prema glavnom dijelu ili selu ili u Velikoj Brijesnici. Imali smo nedavno još jednu pljačku na području naše općine i očito da moramo poduzimati određene korake. Da se nije pojavila ova firma Wirac. Net mi bi to uradili i bez njih, ali ćemo iskoristiti na neki način njihovu dobro volju. Naravno dobra stvar je da omogućimo našim građanima da imaju izbor, da to ne bude samo Telemah. Wirac neće dobiti usluge koje mi njima „dajemo“ ništa jeftinije nego što je to dobio Telemah. Čini mi se da je 10 KM po stubu i Vijeće je već donijelo odluku i od toga se neće odstupati. Ono što je dobra stvar ja vam ne mogu opisati koliko se delegacija naše stanice radovala tome što ćemo mi uraditi. Dogovorili smo se i ja želim da vas upoznam da ne treba to nama da stoji ovdje da mi to gledamo gdje ko ide. Ti uređaji će biti instalirani u Policijskoj stanici i dežurni policajac koji bude radio on će moći u svakom momentu da prati i eventualno da pomaže. Objašnjavali su mi i da ne pričam ovdje o tim stvarima, jer možda nije ni dobro. Shvatio sam da ćemo na taj način unaprijediti sigurnost naših građana. Naravno njihova sugestija je na mjestu ići ćemo i u tom pravcu, ići ćemo na puštanje kompletne javne rasvjete i ići ćemo na zamjenu ili izmjenu sa onim štednim sijalicama. Dvije godine smo bili na neki način blokirani i želim da vas upoznam da će, ako Bog da, općina Doboj Istok sa ovom godinom završiti i neće imati dugovanja ni prema kojim dobavljačima. To je na neki način bio naš zajednički cilj da stabilizujemo budžet i da u narednom periodu pokušamo da što više naraste.“

Dr. Ferid Konjić, predsjedavajući Općinskog vijeća: „ Ima li još diskutanata? Piše ovdje da se naknadno sklapa ugovor i da će ugovorom biti sve izdefinisano. Mi dajemo samo saglasnost i razumije se iz ovoga da mi dajemo saglasnost, a sve ostalo definiše se ugovorom. Ne vidim više prijavljenih. Ko je za ovaj zaključak?“

Glasanje: ZA – 17, PROTIV – 0, UZDRŽANIH – 0.

Ad.12. Razmatranje zahtjeva Ahmetović (Huseina) Ešefa iz Brijesnice Male za davanje saglasnosti susjeda,

Dr. Ferid Konjić, predsjedavajući Općinskog vijeća: „Dobili ste materijal, dobili ste stav službe i tačku dajem na diskusiju.“

Hasan Hasančević, predsjednik kluba vijećnika SDA: „Imam obavezu pošto često razmatramo ove tačke, a i na klubu smo raspravljali o ovome. Nije problem, ali molim sekretara općine, načelnika, pravobranioca da se pokuša naći neko drugo rješenje, jer imamo informacija da na drugim vijećima ne da ne dolaze, nego je manji broj ovoga. Znači da se pokuša iznaći najbolje pravno rješenje da se rastereti. Ovo je i kolega Mehinović nekada inicirao, jer svaki puta imamo 3 – 4 tačke. Kolegice Emira kada budete vi u većini i kada vi budete pravili zakone, krojili odluke onda ja vama stojim na raspolaganju.“

Kemal Bratić, općinski načelnik: „ Ne želim da ova moja diskusija ispadne kao replika uvaženom vijećniku Hasančeviću i predsjedniku kluba vijećnika SDA Doboj Istok. Treba da nam imponuje i dabogda imali svaku sjednicu Vijeća 14 ovakvih tačaka zato što ljudi grade. To treba da nam imponuje. Dalje, za sve ono što uradi uprava, naši građani plate i ne postoji nikakvo drugo zakonsko rješenje osim ovoga. Za svu imovinu koja je na općini Doboj Istok nadležno je Općinsko vijeće. Može se dati ovlast da li načelniku ili pomoćniku, ali u ovom slučaju ne. Molim vas da uvijek imate u vidu, danas imamo dva zahtjeva što znači da se grade dva nova objekta. Od toga će građani platiti korištenje građevinskog zemljišta, pa rentu, pa prijem itd. i to je dobra stvar. Dobra stvar je prije svega što grade, a ne moraju ni platiti, što naravno ostaju, jer grade na području Općine Doboj Istok i ne vidim ja zašto bi bilo nama teško. Ja bih volio da bude po 14 tačaka, naravno da bude u skladu sa zakonom, da ne smeta nekom putu po našem prostornom planu, da građani grade.“

Dr. Ferid Konjić, predsjedavajući Općinskog vijeća: „ Ima li još diskutanata? Nema. Ko je za? Glasanje: ZA – 13, PROTIV – 0, UZDRŽANIH – 3 (Senada Džanić je odsutna).

Ad.13. Razmatranje zahtjeva Hrnjičić (Kadrije) Mine iz Brijesnice Velike za davanje saglasnosti susjeda.

Dr. Ferid Konjić, predsjedavajući Općinskog vijeća: „ Materijal ste takođe dobili, stav službe ste dobili, tačku dajem na diskusiju. Ne vidim prijavljenih diskutanata i dajem na izjašnjavaње. Ko je za? Glasanje: ZA – 13, PROTIV – 0, UZDRŽANIH – 3 (Senada Džanić je odsutna).

Na ovaj način smo došli do posljednje tačke dnevnog reda. Hvala vam na učešću u radu i vidimo se sljedeći put.“

Sjednica je završena u 12,40 sati.

*ZAPISNIČAR
Behara Hadžić*

*SEKRETAR
Omer Hadžić*

*PREDSJEDAVALAJUĆI
OPĆINSKOG VIJEĆA
dr. Ferid Konjić*

Službena zabilješka:

Zapisnik je usvojen na 31. redovnoj sjednici Općinskog vijeća Doboj Istok održanoj dana 30.11.2019. godine.

U Klokotnici, dana 03.12.2019. godine

*Zabilješku sačinio
Omer Hadžić, sekretar Općine*